

高平縣志

知高平縣事龍汝霖纂輯

人物第六 上

史記索隱曰列傳者叙列人臣事迹可傳於後世故自馬遷爲列傳歷史因之而稗官野史恒多著述如趙岐之三輔決錄周斐之汝南先賢習鑿齒之襄陽耆舊唐韓潭之統載宋之南陽先民傳政和郡國人物志皆以品彙羣倫闡揚琦行俾後之覽者得楷模先正慕義而興高平故志所載虞溥郗鑒諸人率非邑產刻去則晉唐間寂無一人豈山川之靈悶於曩代亦邑乘創自楊子器宋明以前記

高平縣志

卷六

人物上

載缺略賢人君子湮沒不彰者衆矣今就故志釐正而裒益之節行薄長胥載方策庶襲從長之義以爲來鑒至局於見聞遺佚或多亦望後之人益而正焉邑賢良漢則原臣周大夫原伯魯之後官谷口令稱循良子孫遷陽城襄敏公傑其裔也 陳龜字叔珍少有志氣永建中舉孝廉五原太守永和五年拜使匈奴中郎將時左部亂龜以單于不能制下促令自殺坐徵下獄免後再遷京兆尹時三輔豪強多侵枉小民龜勵威嚴平理怨屈郡內大悅會羌胡寇邊桓帝以龜世知邊俗拜爲度遼將軍龜臨上疏言前涼州刺史祝良應顯異以勸功能又宜更選匈奴烏桓

護羌中郎將校尉除并涼二州今年租更寬赦罪隸帝覺
悟乃更選幽并刺史自營郡太守都尉以下多所革易下
詔爲陳將軍除并涼一年租賦以賜吏民龜旣到職州郡
震攝鮮卑不敢近塞省息經用歲以億計大將軍梁冀與
龜有隙譖其沮毀國威挑取功譽不爲胡虜所畏徵還遂
乞骸骨復徵爲尙書上書言冀罪狀請誅之帝不省自知
必爲冀所害不食七日死西域胡夷并涼民庶咸爲舉哀
弔祭其墓見漢書

北魏則卜冀州安東將軍李崇客也高祖南征崇副咸陽
王禧都督左翼諸軍事徐州降人郭陸聚黨作逆冀州詐
降爲叅謀數月斬陸首賊徒潰散事見崇傳

高平縣志

卷六

人物上

二

宋則張維則幼修飭不苟同流俗試大理寺直驍騎尉以
直諒聞景祐四年提典五房公事厯主客司郎中知晉州
軍事 段保以騎射異等拜爵屢捍邊閫嚴號令繕甲兵
築城壘修屯田遇征討則備前驅授景陵衛指揮使 李
常侍福王之後家隴西成紀縣五代時爲澤州守遂籍高
平善治生勤於農桑與傭奴力作不少懈退休卽讀書鼓
琴事親教子敦尙行誼遠近慕之五府連辟不就卒塋董
寨村

金則張奕字彥微以蔭補官仕齊爲歸德府通判齊國廢

有兵二萬在郡謀爲亂約夜半舉燧相應奕知之選市人授以兵結陣扼其要巷開小南門以示生路比明亡匿畧盡擒首惡誅之會都統完顏魯補以兵至欲根株餘黨奕保以闔門遂止承制除同知歸德尹事天眷元年以河南歸宋改同知沂州防禦使事三年復取河南授汴京副留守歷陳秦二州防禦使同知太原尹晉寧軍報夏人侵界詔奕徃征之至境按籍各歸所侵土而還奏言折氏世守麟府以抗夏人本朝有其地遂以與夏夏人夷折氏邱隴戮其屍折氏怨入骨髓而不得報今復使守晉寧故激怒夏人使爲鼠侵而條上其罪欲開邊釁以雪私仇耳今獨

高平縣志

卷六

人物上

三

可徙折氏他郡則夏人自安朝廷從之移折氏守青州正隆間同知西京留守事遷河東北路轉運使大定三年徵爲戶部尙書甫視事卒見金史 李森異次子字彥實工

詩年十八宋時澤州發解第一補萊州文學金天會間歲大饑斗米千錢餓殍載道森出粟千斛賑之活者甚衆或曰易此可得數千緡森笑曰活人數千不愈於數千緡乎途遇二人病垂死掖至家醫而遣之時盜賊接境森諭其首曰汝等止可取財萬勿殺人皆羅拜而去 李曼森長

子以能賦稱大定三年登第任隰州軍事判官政尙平易長子伯疇高材能文善騎射次子申立明昌二年登第歷

政平化平秀容三縣令考績爲天下最終河東令鹽鐵判官李晏字致美森次子皇統六年登經義進士第調岳陽丞再轉遼陽推官歷中牟令會海陵營汴京運木於河經三門之險前後失敗者衆晏領之乃馳自行臺散木投之水使取於下流人便之艱起補尙書省令史辭去授衛州判官世宗素識其名召爲翰林詣閣謝慰勞甚至尋除西京留守世宗謂近臣曰翰林舊人少新進士類不學詔赦册命之文鮮有能者可選外任有文學士爲之因舉晏上曰晏朕所自識於是召爲翰林直學士一日召晏讀新進士策至縣令闕員問曰朕思此未知所出對曰國家設

高平縣志

卷六

人物上

四

科取士始分南北兩選北選百人南選百五十人後南北止設詞賦一科每舉限六七十人故闕員也詔後取人毋限以數擢吏部侍郎尋遷翰林侍講學士兼御史中丞會朝士以病謁告世宗意其詐謂晏曰卿素剛正今某詐病以宰相親故畏而不糾耶晏跪對曰臣雖老平生所恃者誠與直耳百官病告監察當視臣爲中丞官吏姦私則當言之病而在告此小事臣容有不知其畏宰相何圖焉旣出上目送之曰晏年老氣猶未衰初遼主撥賜戶民輸稅於錦州龍宮寺歲久沒爲奴有欲訴者害之烏中晏具奏僧不殺生况人命乎遼以良民爲二稅戶不道之甚男女

雜沓於僭中亦未便世宗怒呼辨再三獲免者六百餘人
世宗不豫命宿禁中一時詔册皆晏爲之章宗立畫十事
一風俗奢僭宜定制度二禁游手三宜停鑄錢四免上戶
管庫五宜興禮樂六量輕租稅七減鹽價八免監官賂納
虧欠九有司尙苟且乞申明經久遠圖十禁網稍密宜尙
寬大又奏乞待制修撰官更直進講陳言文字以廣視聽
二年授沁南節度久之致仕復起爲昭義節度明昌六年
歸老詔除其子仲畧左司員外郎爲澤州刺史以便侍養
謚文簡見金史 李仲畧字簡之晏子登大定詞賦進士
第調五臺主簿母服闋轉韓州軍事判官屢遷左司都事

高平縣志

卷六

人物上

五

爲夏讀册官還權領左司嘗奏事退上顧謂侍臣曰仲畧
精神明健如俊鶻脫帽又曰李仲畧健吏也尋轉員外郎
特授澤州刺史以侍父疾父喪免起爲戶部郎中奏曰凡
救其末不若正其本所謂本者厚風俗去冗食養財用而
已厚風俗在乎立制度禁奢僭去冗食在乎寵力農抑游
惰養財用在乎廣儲蓄時斂散商賈不通難得之貨工匠
不作無用之器則下知重本重本則末抑矣又條陳制度
之宜上嘉納之俄授翰林直學士兼前職命充經義讀卷
官上問曰有司謂經義不若詞賦罷之何如奏曰經乃聖
人之書明經所以適用非詞賦比乞自今以經義進士爲

考試官庶得碩學之士上可其奏改吏部郎中遷侍郎兼翼王傅俄兼宛王傅時知大興府事紘石烈執中坐贓命鞠之罪當削解權要競言太重仲畧奏曰教化之行自近者始京師四方之則郡縣守令無慮數百此而不懲何以勵後况執中克殘狠愎慢上虐下豈可宥之上曰卿言是也授山東東西路按察使泰和五年卒上聞之歎曰此人於國家宣力多矣何遠至是耶贈朝列大夫謚襄獻仲畧有父風剛介特立不阿權貴臨事無流滯所任以幹濟稱見金史 王晦字子明中明昌進士調長葛主簿有能聲察廉除遼東路轉運司都司勾判官提刑司舉其能屢遷

高平縣志

卷六

人物上

六

戶部郎中貞祐初或舉晦有將帥才俾募人自將得死士萬餘統之衛通州粟入中都有功遷霍王傅以部兵守順州攻牛欄山以解通州之圍遷翰林侍讀學士加勸農使九月順州受兵遣人突圍召滄景別部主者不肯發故部曲王臻請曰事急矣自苦何爲晦曰朝廷何負汝耶臻曰臻雖負國不忍負公因泣下晦叱曰吾年六十致位三品死則吾分詎從汝耶將射之臻掩泣而去將士縋城出降晦被執不降死初晦被執謂其愛將牛斗曰若能死乎曰斗蒙公見知安忍獨生併見殺事聞贈晦榮祿大夫樞密副使命有司立碑歲時致祭錄其子汝霖爲筆硯承奉見

金史 王謙少沉靜有志操是非喜怒不形於色隨母至高平愛其山水遂家焉受學於王晦立經釋典九流七畧咸所精練以子貴封朝列大夫卜築西山直躬化俗有太邱風 趙楠字廷幹擢進士第天興元年爲刑部郎中忙押門者定國軍節度使納坦出之子右丞相端之孫也與兄石里門及護衛顏蓋宗阿同飲忙押門詐以事出投北兵尙書省令楠推其家屬及同飲人時上下迎合必欲以知情處之忙押門妻皆被訊掠其母完顏氏曰忙押門通其父妾父殺此妾忙押門不自安遂叛求脫命而已委曲推問無知情狀省中微聞之召小吏郭從革諭以風旨楠

高平縣志

卷六

人物上

七

方食擲筭於案大言曰甯使趙楠除名不能屈斷無辜以不知情奏且以妾事上聞上曰丞相功臣納坦出父子俱受國恩吾已保其不知情也立命出之見金史 路元爲省曹尙書郎五典郡事不畏強禦人以路包拯呼之累遷河間按察轉運使 張國綱外柔內剛事不避難爲濮州刺史死於王事 張師穎官震州均徭便民調解州沁陽令擢御史以明敏稱授西京巡警使糾治畿輔人畏其嚴慝武甯軍節度使卒於官 張翬忠信碩大以能吏稱仕至臨橫路同知轉運使 楊公恕恭儉畏慎居官有能名仕至順天軍節度同知

元則張寶中統間爲永興路百戶適江寇爲亂命寶督兵
檄至卽束擔以行時方元旦擒渠魁以歸遷都指揮僉事
居家孝友建甯明道先生鄉校文館久廢寶力復之 宋
翼舉茂才異等任永甯主簿政肅刑簡至治中擢翰林學
士改御史豪右斂迹諸所條陳多稱旨遷淮西道廉訪使
賈魯字友恒延祐至元間兩以明經領鄉貢泰定初授
東平路教授屢遷戶部主事父服闋會修三史召爲宋史
局官遷中書省檢校上言八河倉淪沒官糧百三十萬斛
其弊由富民兼併貧民流亡宜先正經界俄拜監察御史
首言封事宜專達聖聰不宜臺臣先可否已由山北廉訪

高平縣志

卷六

人物上

八

副使入爲工部郎中言考工十一事至正四年河決命魯
行都水監魯循河道察地形徃復數千里備得要害爲圖
上二策其一議修築北堤以制橫潰則用工省其一議疏
塞並舉挽河使東行復故道其工數倍會遷中書右司郎
中議未竟其在右司言時政二十一事皆見舉行尋調都
漕運使條奏漕政二十事朝廷取其八一京畿和糴二優
恤漕司舊領漕戶三接運委官四通州總治豫定委官五
船戶困於壩夫海運壞於壩戶六疏濬運河七臨清運糧
萬戶府當隸漕司八宣忠船戶付本司節制事未盡行旣
而脫脫復相集廷臣議河決或言築堤或言疏南河遣工

部尚書成遵行視終莫決魯昌言必塞北河使復故道役不大興害不能已復以前二策進丞相取其後策與魯定議召入奏大稱旨十一年命爲工部尚書總治河防使領河南北諸路軍民發汴梁大名十三路民丁十五萬廬州等戍十八翼軍二萬供役一切從事大小軍民官咸聽節度便宜興繕仍命以兵鎮之自黃陵岡南達白茅放於黃固峪只等口又自黃陵西至陽青村合於故道凡二百八十里有奇自四月鳩工七月鑿河成乃塞決河九月舟楫通十二月諸埽堤成浚河復故道南匯於淮又東入海召還朝以河平圖獻超授集賢大學士勅翰林學士承旨歐

高平縣志

卷六

人物上

九

陽元製河平碑以紀其績且宣付史館詳見元史河渠志尋拜中書省左丞十三年從平徐州脫脫命分攻濠州魯督戰誓師曰吾奉命統八衛軍頓兵於濠七日矣爾諸將同心協力必以今日取城池然後食急策馬麾進忽頭眩且戒兵馬弗散竟卒有旨賜交鈔五百錠給葬事子稹見元史

明則賈五會魯子仕明授錦衣衛指揮聞靖難兵南下奮然曰世路如此禍難將及吾當死於此集鄉兵拒敵死之家屬悉遭俘戮府志作賈五舍 崔謙舉人知吳堡縣清慎惠兼之宜廟獎諭遷知懷慶府 郭質舉人知永壽定

與兩縣有廉名憲宗所嘗賜清官勅者也擢知光州以上
申下三則均徭列郡遵爲式卒於官祀名宦 畢璽舉人
知任邱縣縣瀕河患水璽疏得故道而利濬之並甃城垣
值邊警民恃無恐轉德州及揚州府同知所在有聲祀名
宦遷戶部郎中總理遼東糧儲轉兩淮鹽院使蒞以清簡
絕請託議處餘鹽以充邊寔預搭商課以均分場宿蠹以
清爲銜者所誣去任所著有石屏文集家乘餘錄 牛輔
舉人知安岳縣平易有守嚴肅有恩祀名宦 郭瀄成化
舉人授西安同知取與不苟死邊事 申良字廷賢弘治
舉人授招遠縣闢石田千餘頃山東盜起豫爲攻守具追

高平縣志

卷六

人物上

十

擊盜至黃縣俘斬數百人已復破走之歷知諸城良鄉權
貴往來要索悉拒之遷安吉州錦衣葉瓊倚錢甯勢奪民
田良悉還之民瓊嗾奸人誣奏良事得白遷常州同知招
遠民懷其政圖象祀之入爲戶部員外郎以諫大禮杖死
贈太僕少卿見明史 陳玠字琇夫知桐柏縣戢礦徒興
學校忌者以他事逮之改沔縣城供役夫銀以便番貢擢
保定府督邊餉給散以時禁債帥不得獵取年凶請賑活
者以萬數後以疾歸居官餘奉分諸昆季家無私焉 郭
城定子入貲爲安州判官權知州事會大饑招集流亡城
稅額之半監司考之上上是時劇賊劉七輩起蕪破城殺

吏城以所治義勇屢破之境以獲安居久之乃有劉廷芝
被誣事芝新城致仕主簿也蔣知府者素害芝會仇家誣
以人命蔣故致之死獄成城訊其情出之蔣怒更他妾後
讞者仍是城蔣慚而愈怒因構陷之遂歸 郭鋈字允重
祖定父坤正德己卯鋈弱冠以春秋舉於鄉中嘉靖壬辰
進士皆第四授行人歷工禮刑戶四科給事累有建白工
部尙書有不職者抗疏論之念天下戶口版籍多耗實數
宜行攢造法上可其奏自罷巡鹽後間遣大臣清理鹽法
鋈論極不便遂罷遣常語人曰言官貴識大體劾官邪先
其急要若恣己意毛舉細故變亂成法以博名高吾弗爲

高平縣志

卷六

人物上

七

之矣擢太常少卿丁母憂賜諭祭歷官工部右侍郎總理
蘆溝橋元雷殿寶源局諸大工轉左督修京師外城工竣
賜金帛加食尙書俸致仕爲文古雅簡練得左氏之體著
有一泉文集 郭鑿字允新父城嘉靖乙未與從弟鑿同
舉進士選庶吉士戊戌爲會試同考官辛丑除檢討丁外
艱起擢修撰與修大明會典壬子典應天鄉試稱得人官
祭酒端模範謹章程本經術以爲教遷南京工部右侍郎
卒賜諭祭鑿明於春秋清夷簡重內行篤至束身嚴而待
物恕未嘗臧否人物人有言者頷之而已詩文典則有翰
林詩稿國學文集家居集 趙軌嘉靖進士官工科時內

奄用事私置禁器軌抗疏謫封邱丞尋復罷職隆慶初楊
溥陳建言得罪者三十三人皆忠謹宜及時錄用詔起軌
禮科值郊祀上戎服出軌遮道諫止疏請文廟從祀退馬
融王弼而進薛文清嘉納之官終太僕寺卿 張雲路字
伯登負才識敢爲成進士官行人奉使一無所取爲御史
巡關東懲貪帥邊境肅清已按南直隸風裁峻厲諸道惕
息趙文華欲攘征倭功先上捷書媒孽撫臣昏邦輔雲路
抗章論奏不報未及代爲忌者詆譏去官 馮顛嘉靖舉
人慷慨有大志知武邑縣累遷南京戶部郎中遼陽僉事
所歷止携一僕有清操 王雲衢字道亨貢生判順德曾

高平縣志

卷六

人物上

七

條上馬政事歸有光記其不因弊政擾民人稱遺愛遷鎮
江府同知上防倭十策不報歸後臺司薦晉布政叅議
郭東字仁府嘉靖進士歷知嘉興嵩二縣擢南京刑部主
事以親老請終養里居十八年後起爲太常卿東好讀書
恭謹淡泊建岙陽書院招士講學號石堂會今猶名其村
爲文章典雅醇正著類博錄子嗣煥萬歷進士官至蘇州
府同知詳見遺傳 常存仁字靜甫嘉靖進士知邢臺有
囚婦誣坐殺夫罪存仁廉得其實急出之擢知彰德府江
甯王驕縱虐民請論如法錮鳳陽府有贖緩萬緡存庫不
取及兵備榆林後官遣吏津送仍却之居官二十年不名

一錢里無餘產 蘇民牧字乃後厚重寡言登進士知長安縣權給事歷山東川陝三任監司二十載聲績甚著自律一如寒素 劉虞夔字和字七歲能文十六魁選十九登隆慶辛未進士居翰林於書無不窺爲文有深湛之思代王言溫醇典藻與黃葵陽沈蛟門齊名在經筵多所啓沃嘗說詩夜如何其章反覆發明人主憂勤之念上爲改容庚辰癸未分校禮闈蕭良有鄒德溥梅國正皆所取士也嘗詹事府詹事以母喪歸服闋會有詔修國史閣臣王錫爵舉爲副總裁給事遠申立劾之虞夔亦疏請終養父沒以哀毀卒年四十有五廬居馳疏爭建儲事不果上自

高平縣志

卷六

人物上

三

署曰漆室葵忱著有宮詹文集 馮養志字若曾顛曾孫進士知洛川不事苛察撫民有恩歷任邱縣遷文選司員外郎以事調判長蘆後以介直見謫忠愛之忱至老不衰 李向春字元甫以貢士知西鄉革里甲私貼歲爲民省萬金築洋河堰以免衝決之患平二十年不決訟有枉者力雪之及疾民爲祈禱者以萬計性孤介忤上官罷職行李蕭然民遮道攀留幾不能前邑祀名宦著有家訓面龐鏡觀錄宦遊林卧集等書孫棠馥 楊暄字杏圃崇禎進士知渭南縣歲大凶舉力拯之斃奸人於杖民獲安考課爲關中最十六年李自成抵渭南暄已擢兵部主事未之

知也籍邑子弟嬰城守以礮擊賊賊稍引去會舉人王命誥開門迎賊被執索印不與詬罵死暄少治春秋爲文幽深澹折晚歲登第死贈陝西按察僉事廕子祀渭南

國朝則王邦柱字石甯前明進士 國朝官大理卿出入

侍從著作頗多亂後失編歿贈工部右侍郎 李藻字鑑

明號慶餘前明舉人知保定縣調大城已而知涿州所至有聲擢兵部職方司員外郎以知兵稱遷遵化監軍道僉事屬弁某錮金墻中詭以蜜進立糾之調湖廣沔陽道聞明北都變棄官會 國初大將軍帥兵南下聞其才委權湖廣按察使兼武漢兵巡道尋授辰常僉事道歷順慶叅

高平縣志

卷六

人物上

高

議襄陽副使以卓異擢太常寺少卿初官順慶時方試士賊忽擁衆至諸生洶洶將散走藻時爲提調曰城以外俱賊卽去何之乃決策令士子竣試事在襄陽日議復均州聞城門久燬兵難駐守乃潛度尺寸密爲門夜由水道載入翼日兵至登城固守賊遂遁屢遷刑部侍郎嘗告人曰法官之職有執而已惟爲執乃所以爲全耳以疾乞休蒙慰留卒於官 崔子明字見心進士授戶部主事父堂患瘴以子明累年視藥裹竟忘其病知葉縣蘇驛困興水利弭盜救荒民多賴之遷計曹視通州倉清介著聞卒於官著有讀書聲經國大業丹頭地等書從弟光嵩副榜知源

陽縣歸而讀易賣藥畢振姬與友善沒志之 畢振姬字
亮四號頡雲八歲讀書十行並下舉前明鄉試第一 國
朝順治成進士授平陽府教授屢遷刑部員外郎癸巳出
分守濟南時歲旱盜起流民多踞山谷振姬日夜馳三百
里悉遣散之泰山香稅羨餘故給官費振姬一無所受悉
以供軍巡廣東兵備驛傳水利時三藩四院倚軍興遣使
多需索振姬與之立約無派折費大減屢遷至廣西按察
使平反寥挾兌等大獄搜遺匪海峒悉清經畧洪承疇竒
之擢湖廣布政使振姬自破其面以疾歸蒞官往返一僕
一馬清儉逾寒素里居置祭田義田役田社倉以贍族里

高平縣志

卷六

人物上

五

日勤耕耨陳相國廷敬訪之疑塵蔽蕭不復知爲振姬也
暇輒授後學有師法康熙戊午三藩事起劉司寇健魏司
憲象樞疏薦諸朝徵不起乃與魏司憲書規畫三藩事卒
如其策著有尙書註西河遺教四州文獻三川別誌等書
爲文主春秋內外傳奧博蒼堅得之管子爲多詳見遺傳
李棠馥字子棻號漢清向春孫順治進士授刑部河南
司主事遷郎中精研律意而本以寬恕尙書黨公亟稱之
戊子同考順天鄉試出督湖南學楚士翕然艱歸服除補
湖廣荆西道時西山遺孽未靖禁旅欲雜處民間棠馥持
不可往復爭論大將軍爲營郊外遷陝西驛鹽道副使驛

故難支大兵進取三川鄰驛協餼不以時至疏請如額數
從本驛留支而以他驛協者解司庫諸驛獲蘇尋擢四川
按察使在蜀一年起授兵部右侍郎謝病歸丁未起督倉
塲改兵部右侍郎未幾以年老乞歸居鄉出白金勸葬掩
柩設藥局拯疾苦甲寅輸糧千石以佐軍比卒猶以未報
國恩爲恨云 張汧號壺陽少工書有文譽順治進士
始弱冠授庶吉士改禮曹屢遷至福建布政使巡撫湖廣
居官勤敏善理繁劇馭屬吏嚴而有恩友諸弟俸廉不以
毫髮私晚年失職亦無戚戚容著有壺陽集 趙介字岸
鳧進士知金壇政寬大不急繭絲訟獄衰息以里民夾和
高平縣志

卷六

人物上

六

倉米事奪職父老泣留不得建祠龍山子箴舉人官臨晉
教諭 田逢吉字凝只號沛蒼順治進士授編修累官內
國使院學士終浙江巡撫逢吉年五歲父馭遠爲流賊所
執以刃脇之號泣父傍若請代狀賊感動得無害在翰林
戊戌分校庚戌主試所取士如孝感安溪遂甯太倉崑山
卽墨武進猗氏平湖諸公後皆爲名臣任學士日或議出
穀貸民秋成後少收其息逢吉曰此與青苗法何異事獲
寢嘗奉使賑淮陽奏請寬逃人禁俾流移者隨地收養全
活無算及巡撫浙江適耿逆亂李之芳督師金衢逢吉居
行省治軍務早夜不少休以勞疾歸 張彥珩其先洛陽

人闖賊破洛避亂來高平成進士授戶部主事已而出知興化府時寇賊猖獗力籌裕餉禦侮之策擢粵東兵備道兼學使海外兵氛未靖彥珩剿撫安輯之艱起補四川糧道大軍剿水西輓運不絕遷雲南按察使未幾擢楚藩告歸 武超字景昇康熙初從昭武將軍楊提剿山左逆黨以功擢守備復從入閩時洛陽橋爲賊所據泉郡被困超請以身先之身被二創遂奪洛陽橋解泉州之圍後海賊踞廈門金門等島超曰此易與耳願滅此而朝食帥壯而許之擒其魁餘黨悉就撫擢福建提標遊擊泉郡商賈往來海口者故事恒賄諸營以爲庇超胥禁除之時有楊叅

將者被劾超力白其枉楊餽遺之超曰吾以爲國非爲公也累遷雲南叅將厲器械禁苗獮之侵掠邊圉以安 李棠薜棠馥弟性孝友有幹才嘗奉母守堡解劇賊之圍以拔貢授兗州通判汰蠹役明聽斷監視漕鹽稱平允詿誤去官 李耀雯字章明棠馥子性明敏粹於學侍郎晚年疏稿多出其手以恩蔭授官父命之仕曰兒形單影隻父母桑榆願終侍養也服闋授光祿寺珍饈署正一切陋規毅然革除長官薦之會卒 崔涵璽子明子以廩生入監得麻城令懲奸賑荒滇逆未平軍需旁午悉立辦遷慶陽司馬駐甯夏五衛軍受其節制艱起補真定同知分理宜

鎮悉心籌畫以裁缺歸 崔涵鑿子明子以史館議叙授
江南麗江通判不赴後補廬州州判剔漕弊攝知英山事
除耗羨署合肥徵逋祛蠹復值歲飢多方賑卹以勞卒於
官 田光復進士早孤事母孝登第後授鄒縣令鄒衝邑
號難治光復絕苞苴嚴令甲訟無寃民時有水患捐金代
民補租歲飢請賑給不允再請始得粟萬石全活無筭流
亡歸復給以牛種艱歸起補蒲江地瘠民稀徭徠撫循猝
遭疾卒 田長文字近庭逢吉孫少事祖若父以孝聞中
康熙進士授鎮海令邑濱海舊有海塘禦鹹潮蓄淡水以
資灌溉歲久圯請米千石完築之穿山土塘易之以石三

高平縣志

卷六

人物上

六

水河年久淤淺計工挑濬復建石閘以便蓄洩有言開墾
荒蕩者條其害力却之復以稅漁船請亦陳其苦獲免焉
毀淫祠以作書院延師課之攝知鄆縣歲荒勸賑請弛海
禁招商運米至數十萬石價頓減長文爲治以體察地方
利弊爲急陋規一無所受丁父艱起還浙除淳安因病謁
告制府以良吏留之竟卒 田次何字處庭長文弟性孝
友康熙甲午舉於鄉授通州同知分守糧捕沙地濱海俗
悍民刁盜賊出沒次何嚴稽察積匪爲斂以疾去補長治
教諭勤誘掖經指授者爲文章有法度嘗云爵祿不在崇
卑俱隨分盡職卽上不負 國下不負所學也 崔文燿

字郁周由明經授西甯令一以興利除弊懲奸植良爲務制府吏以抽查稅務至邑徵求無厭民不堪廉得之置諸法逆犯李九桃事發奸民入黨者東安十一州縣皆有甯邑獨無制府喟然曰非良吏嚴明化導不至此欲上其狀辭曰民自畏法耳令何與焉以疾歸 姬士麟字文叔少穎悟師事繩錦文有法則康熙庚子舉於鄉出知金壇縣邑號疲難下車後絕請謁催科有法後攝沐陽縣邑故濱海旱潦不常爲疏水源備蓄洩民以爲德 牛宗文字吉人乾隆進士歷知山東臨朐堂邑鄒城三縣在官無赫赫名去後恒係人思自鄒城告養歸爲邑書院院長抗師道

高平縣志

卷六

人物上

九

以迺後進每日吾以母老不克終仕以展所學教育人材亦儒者事也 祁杲字旭陽家富於財常注意經世之務乾隆間入貲爲工部郎初除官時適陽高有修城役當事者以陽民樂輸請於 朝事下部議久未決杲獨直前請於大司空董公曰陽高修城之費宜別有調度三晉素有公皆號曰樂輸保無勒抑耶下吏晉人也敢以告董公嘉其新進有膽 祁塏字松軒汝熒子嘉慶成進士授庶吉士散館改邑令出知粵東之長甯縣量移新甯居官以重士勸農戒訟爲心耆老至必密詢鄉之渠惡册識之民有以盜訴者出册指名捕之罪皆伏衆以爲神礪石飢疫出

祿精以爲賑後以弟墳撫粵遵迴避例改廣西知全州墳
督兩廣再改雲南以疾歸 和墳字竹軒壻弟也嘉慶進
士改刑部主事擢郎中屢偕使平反大獄出爲河南糧道
擢浙江按察使浙有武康縣獄屢勘未決前按察使至自
裁墳至得其寃昭雪之後以刑部侍郎出巡廣西適江華
猖叛蒼梧徭應之墳撫其徭之良者而命將追剿逆徭於
芳林渡獲其魁事平 賜宮少保銜疏陳善後六策一重
官守以資治理二選徭目以定賞罰三禁游混以安生業
四收火器以嚴禁令五勤訪察以別情僞六興義塾以化
氣質 詔曰可移撫廣東廣東地邊海孺民俗刁悍墳乃
高平縣志

卷六

人物上

三

修農田圍基築虎門礮台嚴懲潮民之械鬪者復召爲刑
部尙書英夷之役以墳習粵事命督兩粵當是時夷船已
陷虎門陷沙角逼廣州勢張甚將軍奕山不能禦夷首百
麥擾及三元里民洶洶怒磔之幾不測墳知粵民之可用
也檄沿海諸邑結爲團夷人憚焉和約乃定墳以後患未
艾復議設險獅子洋屯田虎門清外洋之盜 制允行焉
又以求才無法請變通考選欲仿唐宋制科爲五日曰博
通史鑑曰精熟韜鈴曰製器通算曰洞知陰陽占候曰熟
諳輿圖情形不分文武已未仕皆得以名上聞議寢不行
旋得疾卒於粵 上惜之予謚恭恪祀名宦官其子之銓

之鏐 李渤舉人知直隸甯晉縣縣故有孝河三年兩澹
重以吏胥侵漁民苦於役渤爲祛宿弊立盡其去也民攀
車號泣至不得行復知平鄉民爲立生祠後以干吏議改
遼州學正
昔漢高后置孝弟力田科昭帝更賜郡國有行義者非以
孝義所資扶翼風化而立國之本與晉武帝詔舉孝弟忠
信清白異行之人晉史創立爲傳歷代因焉唐神龍增孝
悌廉讓科宋大觀朝更刊孝弟八行於石犯者不齒於以
磨世勵鈍切矣明初亦復孝弟力田科如李好誠聶士舉
至以白丁擢爲參政凡以甄陶淑行使民知所趨向也

高平縣志

卷六

人物上

三

國朝雍正初令於學宮建孝弟忠義祠以閭巷編氓俾伺
宮墻之列此 聖主植綱常而起衰懦之微權觀於斯祠
可奮然興矣邑以孝義聞者隋則田懋德仁恭子開皇初
錫爵平原郡公父沒哀毀骨立廬於墓側負土成墳文帝
聞而嘉之詔表其閭

唐則雍仙高數世同居天子旌表門閭賜粟帛復賦稅有
司歲時存問見唐書孝友傳

金則張寔父早歿事母孝母病久妻養母有怠卽出之會
歲稔出粟賑飢多所全濟貧貸者百餘人度不能償盡焚
其券

明則王敬洪武初舉秀才母喪傍徨墓所數日不忍去父
強之始歸父歿廬墓三年事繼母如所生永樂間以孝行
卓異旌門子燧以舉人官太僕寺丞父母繼逝廬墓六年
事聞旌表父子並從祀 李振民有孝行父歿哀毀廬墓
晨昏哭泣會早霜殺禾惟振民周廬四十餘畝不爲災且
有雙穗之異成化間旌表 李克紀嘉靖間監生赴銓選
道出潞安適賊據青羊山克紀應募往招撫仗義說之事
漸平而克紀卒後改青羊爲平順縣追贈易州判官 姬
國瑞諸生撫弟國瑋有恩比歿瑋撫其子顯廷亦如之會
水漲瑋携孤姪跨馬疾馳而聽二子徒涉曰義不得以吾

高平縣志

卷六 人物上

三

子先兄子竟兩全焉顯廷舉鄉薦不仕隱於醫 田應運
事繼母孝撫諸弟有恩每出粟以賑鄰里子大良庠生力
學慕義獨脩學宮泮池 裴養志農夫也有上黨罪人匿
里中事發連及其兄養正論死力請代刑已而兩釋之

趙倫太僕卿執祖家素封縣令使倫總輸邊賦三千金盜
夜入索金固不與曰公家財小民膏血吾不忍數千戶重
累也盜怒擬以刃拒如初殺之盡其私藏而賦金竟得全

王錫宏治進士令新會歷裕州守轉廣州性至孝母老
不能侍與人言輒流涕人爲繪望雲圖以表之 王珂服
賈抵揚子江夜鄰舟被劫珂奮身往救盜驚散商船分金

以謝珂堅辭不受 張澤性寬和謙順里有惡少肆辱閉門不與校負貸者悉置之生平絕跡公庭 楊可楹樂於爲善撫孤姪俾成立貧不能婚葬者助之債不能償卽焚其券 郭紹芳東父早孤事母孝母病癱紹芳侍食嘗藥歷二十年猶一日落魄嗜酒有意氣嘗拾遺金尋其主而歸之見東傳 畢應科古貌古心善事善教解紛排難捐貲以賑流離典田以完婚葬孝養庶母五十餘年 楊朝光善守身勤色養推愛以贍親親舟麥助喪貸金不責 緜元珍樂道安貧敦倫重義撫遺孤二十口胥資成立 王命予篤實純良平生不矜己長不言人過遇荒歉捐金

高平縣志

卷六

人物上

三

濟衆 李鶚性喜施予告匱者多寡必應積遺不能償破券遣之弘治中輸粟賑飢授義官 蘇韶性慷慨歲飢出粟數百以活貧人再飢慮民益瘠而懼還以遁也遂以焚券誓子忠事母以孝聞甲申其母以節婦並旌 其實行不傳而以孝被旌者正統中王起孝徐行廬墓者則楊汝節張養心臨淄令李瑾 無實迹而鄉里稱其孝義者則焦一春石有璞田馭華李濬楊文盛邢堯民崔堂張崇恩張克正

國朝蘇天福好義喜施予盜起保聚鄉里賊不敢逼捐修太行東路一百二十里葺文廟尊經閣並兩廡神厨齋宿

所身親監督妻亡不暇顧也 牛位坤明諸生幼英穎喜讀書癸酉試太原會流寇起中道亟還翼其父避南山中猝遇賊度不獲免委身餌賊賊執之及及頸者四斷未及喉血淋漓佯僵卧獲免鼎革後父卒哀毀骨立服除遂不復求仕平生負意氣分財賑宗黨恤患破產不惜子兆捷畢一棟家貧負米潞安以供親日治田山中辰必歸視飲食父母甘則喜事祖母陳一體父志孝養甚篤父家世農嗜讀書一棟命子振姬學曰能得爾祖父歡心吾雖勞不苦也事繼母如所生收葬族之無後者 李志巒性孝父客於外病歸研醫躬治不愈父卒哀毀踰禮至煩母宋

高平縣志

卷六

人物上

五

切責及母死廬墓三年又高才能文章舉振姬稱其長於用意趙介亦避其鋒銳 薛元微性至孝父光生病思牛肉不可得元微割左臂肉以進病遂已知縣白良玉旌之

田多壽順治六年父生蘭死於兵母史被掠多壽時五歲伶仃孤苦幸得長成康熙九年辭鄉里訪母於都城二載始得傾家產贖歸 宋璉家貧父鰥璉奉侍必具甘旨務得父歡父好博偶亡錢不憚璉竊知其故貸錢如數僞作拾遺狀以進父喜以爲所遺錢復得也其善承親志類如此 李培壽字柱石永和訓導內閣中書工文章事親孝性樸素敝衣糲食不啻寒畯好施予設藥局濟人歲飢

煮粥以活貧者 鄭俊進士少以孝友聞登第後邑宰勸之仕以親老辭然貧甚父促之乃出知海康縣治處遼絕迎養不獲不得已履任一以孝弟化民民感之治行報最擢吏部主事尋遷郎中力請終養歸 常思聰以節儉力行重於鄉康熙六十年歲飢販糶絕思聰時少勸父出穀以濟衆或勸糶之思聰曰以粟周急吾財得所用矣且人方嗷嗷而吾因以謀利乎旣而有秋亦不復責償也妻兄遺三子遭繼母之酷思聰慮其不全引至家撫恤之甥邵懷寶少而孤內外忌之思聰泣曰此吾甥也使同已寢食以至成立繼母劉有前夫子其族凌逼不能自治思聰亦

高平縣志

卷六

人物上

五

召而撫焉 張洪聲生而侷儻好義服賈徐揚間雍正時自姑蘇歸同寓客遺一橐洪聲舉之甚重謂同行者曰此彼遺金也吾當守之以俟其返或勸速行卽取之誰知者洪聲正色曰是何言與吾觀其人非能自有此金者可害人而利己乎未幾其人倉皇至洪聲迎謂曰吾固知子必來叩其實主金也與之橐其人拜謝請里居名字洪聲笑曰吾豈望報耶不告而去 張聯璧諸生母楊性卞急曲意承事母歿哀禮交盡又多義行贍病妹闕外氏師事崔子明師故援其家難友人郭鎬死母子無依迎至家養給終身著有愛吾廬稿 趙曦諸生獨力殯葬祖母仲叔死

潁川閭闔二千里扶輿歸葬又葬其季叔好樂育人才遠
近多師之 宋才少孤事母孝貧依姊夫張某灌園爲生
後張老病才養之無倦色人有以責逋相詬者輒出己貲
解之 李東諸生父昌文嘗憤貧困携薄貲遊廣南二十
年不返東少長日牽母衣問廣南所在時相對涕泣及冠
辭母將往尋會母病久之愈乃爲弟婚娶奉母自贖父雅
嗜物徒步抵佛山鎮四訪無踪遇客言父寓瓊遂航海訪
知父居三涯村嘗娶妾生女今歿十三年妾亦適人矣求
妾所在問父墓出贖物哭奠極哀爲女弟擇配乃負父骸
北渡瓊海往返萬八千里爲時一年有奇重趼迸裂血流

高平縣志

卷六 人物上

三

被土危險萬狀乃克歸父骸於祖墓 詔旌其門 許貴

祖朝家於萬厯間創修南陳通濟橋以便行旅歲久漸圯

貴復重修焉 郜綸音奉祖訓忍讓饒二字終身不忘父

存日有貸銀粟者券約甚夥遵母命召貸者各還之 朱

先正性寬和事親孝謹遇貧乏者厚爲賑恤嘗立義學延

師訓村蒙修長途以利行者 王文宇貿易完縣與葛東

岡友善東岡有子懼弗克自立陰以八百金託文宇無何

東岡死文宇呼其子以遺金還之完縣令爲碑表其事

李耀傳監生性質實好義雍正初以孝廉方正舉力辭晚

益好學分輯府志 李培甲內閣中書溫厚醇雅康熙壬

寅歲祿捐貲設粥廠全活飢者甚衆性至孝年踰五十逢
忌日猶伏地爲孺子泣家人掖之始起子錫誥亦以孝聞
母卒哀毀踰常父諭之曰兒獨忘而父耶遂忍泣背父常
撫膺痛父歿廬墓三年 李芳貧未能讀書性至孝母武
病癱瘓扶起卧除穢溺不委妻孥三年不怠 楊純奇字
素之庠生賦性強正里居遇公事慷慨剖析是非必公既
歿里人表其墓曰剛直楊公故思碑 司九經石末里人
孝友忠厚父喪號泣數千里扶柩歸平生好行其德待以
舉火者數十家遇同儕侵蝕默不與較久之其子昌齡請
追風逋怒曰吾爲德而爾爲怨彼力能償甯待索乎於是

高平縣志

卷六

人物上

三

悉折其券弟九儀諸生天姿穎異凡陰陽星厯六壬戰陣
諸書皆能言其意而尤嗜宋五子書中歲寄意岐黃獨有
心得耽酒有飲德疏財尚義樂善不倦與兄類 牛如龍
澗洋孫邑諸生性樸質母宋善病調藥奉饌不假婢妾三
年無倦色父歿伯年老且病謝生徒親侍牀褥衣不解帶
者數載邑人舉其孝辭曰吾循吾分耳與兄友愛終身子
官臨胸戒之曰實心爲之無趨巧勿邀名盡一分心報一
分國 袁九錫性慷慨縣文廟傾圮九錫獨捐貲督修功
竣後復置地以備歲時修葺又嘗修井路二五載始成值
歲荒復捐貲周濟六庄鄰里之貧者凡婚姻喪葬咸仰給

焉 趙繼芳增生孺慕性成母苦節盡心色養平生與物無競及剖是非決可否獨能洞徹事理排衆議抒已見雍正七年 詔舉優行 郜煥崧武生年將七十事繼母不啻所生親歿喪葬盡禮教育幼弟撫孤姪成立 李錫銓監生培壽子伯兄中殤父思子成疾銓晝夜籲天願以身代湯藥必親嘗始進及歿不櫛沐者三年兩弟幼弱伯兄遺孤亦在襁褓撫育訓課俾成立竭力承繼母歡積勞成疾母哭思其孝養未幾亦卒 李樹庸恩貢生好學有文譽家貧性慷慨以乞假者貸予不吝冬置木橋於縣河以便徃來 張煥庠生壺陽孫濛子也少從外王父陳相國讀書京邸聞父病一千四百里六晝夜徒跣歸躬侍湯藥衣不解帶者三年與兄友愛貲產悉讓焉 焦潤貴董自福喬村驛人甫曙於路拾銀一襪二人計不義之財不可受相與送驛丞所後銀主來分金謝二人二人不受 趙爾昭廩生父亡撫孤姪事孀母誠孝弟爾明亦孝友安貧雍正七年 詔舉優行 張瑞生便弓馬習韜鈴雍正九年 詔舉智勇兼優之士督學朱以名應有司促具裝自謂馳驅王事吾志也第母氏篤老何忍離固辭不允會西師解嚴乞歸母喪畢慨然曰吾今乃可出矣未及試卒兄敬生少佐父賈於外親老歸補博士弟子員讀書討論古

今慨然有經世志 張璫賦性淳厚好善樂施與兄友愛
析產讓肥居瘠戚黨待以舉火者甚衆 祁斯清武生性
充直好施予與人盡情無隱歲歉貸貧者粟不責之償助
族人舉四世喪與之貲以養母并坡路圯獨修之通醫蓄
藥濟人常教其子曰人不可不讀書經史之外醫理尤當
知也從兄斯滄謹於內行事諸父諸母愛敬兼至待人以
誠未嘗有惡聲厲色同爨百口立規條內外遵守無間言
田毓萃諸生次何子也醇謹有至性幼時母陳有胃疾
發輒憂泣不寢食歷久遂病肝鬱居喪哀毀盡禮兩兄早
卒撫諸孤如己子姪患疫家人懼傳染不敢近獨力爲調

高平縣志

卷六 人物上

三九

護卒賴以安

郃世可附監生事親孝與弟友愛弟歿教

育孤子女如己出與人犯而不校重然諾扶危濟困無吝

色 張欽璿貢生建甯舊有文廟尊經閣年久將傾璿糾

工犁正功未竣而卒子賡堯繼成之 李全印監生孝友

好義每春於閭里量口貸粟及秋如數以收不計子母

楊金枝性寬和好施予年三十喪偶誓不再娶 郃燧性

公直戚里有急賑貸不責其償建文昌閣於村南延師以

教鄉之子弟 李林相舜子少失母事繼母郃孝母染癆

嗽之疾卧病二年相舜遠出林以醫藥不効割股肉暗投

藥中母服之半月而瘳 侯思玉性至孝父病奉侍湯藥

寢食不進父歿哀毀骨立兩兄相繼亡事母篤於孝養康熙六十年歲饑出粟以爲貸賑焉 孫永祚誠篤好義親老朝夕侍側未嘗少離經營社倉十餘年出入惟謹家故習農獨重文學村設義塾多所成就壬寅歲歉散所儲以賑鄰里居臨丹水秋冬築橋以濟行者 李秉忠監生少孤稍長曲體親意教育郇姓甥四人助其婚娶從子琚一歲喪父一門五孀爲之治田產經理其家焉 李淮事繼母秦如所生再從弟幼失怙恃多方撫養爲之婚娶給以田產康熙五十九年歲歉設法運米以濟貧乏 王如蘭四歲而孤寡母苦節自力年十五母病無力致藥餌中夜高平縣志

卷六 人物上

三

衣冠祝天必曉乃止閱三夕母病良已父兄早世三世遺樞悉力以葬外家乏嗣外祖父母之殯亦如之 楊上通才短而性孝父母惡之時時撻詈未嘗疾怨妻李亦順承夫意事翁姑惟謹父使上通貿易江南感重疾歸值妻亦病父愈怒然夫妻愛敬不少衰久之父始感悟調治之父母歿哀毀致疾妻李禱於樞前願以身代自是誓不茹葷夫婦遂抱沈疾追年五十精力忽強云 王清選少孤事母孝母侯失明躬親侍養不離左右者二十年母歿以哀勞卒 楊增培棟孫性至孝家貧如洗教授度日奉親甘旨每飯必具雖鶉衣不恤也侍父病三旬不解衣父歿水

漿不入口者三日每祭祀必供父所嗜焉 李瑜監生喜
施予助鄰里喪葬給藥餌解紛釋難無少倦子培恩性至
孝侍母病衣不解帶者旬餘叔苦寒資給養之再從兄歿
妻携其子他適親往抱歸長爲授室分以產人謂不愧其
父云 賀掄字秀升事母孝母晚病痿十餘年掄晨夕供
養無不至葬之日嘔血壙中久乃蘇篤於師友師事李棟
棟老失明歲時存問沒後卹其子耗財數千金無怨色其
他稱貸羨支徃徃折券去籍族里婚喪有不給者貧不能
讀者歲出脯資以濟其乏里人車某卜宅兆爲有力者所
奪掄出直之地卒遷車氏 王增字川如從父以賈起家
高平縣志

卷六 人物上

三

然好施豁如也鄰有田某者悍而無賴稱貸者屢矣一日
以破屋索售昂其直增無以應之卽慢罵夜以繼日增避
不與較忽遇諸途田執增手唾其面詈不已路人皆怒增
笑而歸不顧也終假貸以售其屋不數年田某家益落帶
索而行增見而哀之曰此非田兄耶何若是田乃不敢仰
視泣曰吾愧君甚增復厚給而遣之 韓承基字善繼平
居好行其德有急難者必賙之嘉慶癸亥間歲大旱承基
每春粟竟隣人爭拾其糠承基潛令人雜菽粟以遺之宅
樹以榆縱橫成列一夕皮俱盡家人以告承基歎曰此剝
以療飢也吾愧不能賑矣逾年種芥十數畦鄰村菽取殆

盡承基亦知而不校也里人有叔姪爭樹者將訟諸官承基曰若所爭樹直耳我與而直可乎訟者愧而止鄰村有爭松山者屢年訟不決官往視之過承基或託承基乘間爲言承基厲聲曰吾豈通請託者哉汝亟退 焦甘露甫四歲父樹滋隱姓名遊學於外音問斷絕甘露稍長欲求其父母曰非其時也又數年甘露言之亟母乃許越河南湖北江西廣東各行省物色之不遇逢相識者再拜訪詢仍不過二十餘年以貲絕而歸歸而復出者四矣嘉慶壬戌歸自孟津遇徐金章於途語以故金章曰此間有爲韻學師者曰南宮聆其音山西人或爾父耶偕往叩姓氏里

居出遊月日悉合甘露曰果吾父也跪而泣父與俱歸歸二月而卒蓋離家已四十五年矣 郭位臣平居周郵同里凡有貸者輒焚其券歉歲出粟賑飢全活者衆於村置義學俾鄉黨之貧子弟無失教焉 孟萬鍾少失學然事親孝尤好放生一日母左股得惡疾久而益劇萬鍾徬徨無計割股肉以進已而子母皆無恙寺庄鎮道左有石碣曰孝子孟萬鍾割股醫親 趙珍賈於外聞父沒星奔歸廬墓三年 明天真少失父母與兄弟相友愛弟賈於衛死焉天真哭之痛無何兄亦死天真躑躅獨影徒步至衛負其弟遺骸以歸 鄭培少失怙兄育之及長將試於澤

兄病培不往兄強之則對曰兄疾如何忍離耶兄曰而不往吾死不服藥不得已灑淚去試曰經藝成書未竟心輒痛馳歸歸未一日而提學官召之既見詰曰何不書竟培曰兄疾劇思歸耳曰以兄疾試何爲培曰不試兄不服藥出於無何耳提學官曰悌弟哉爲補縣學生員後官祁陽典史 張學志監生慷慨好義有族子積逋五百餘緡貸者將訟諸官學志爲之排解不得私以己貲償之不令兩人知也村人聞而質之曰言則令彼終身愧且或持還是予獲美名而彼不蒙實惠也聞者歎服 焦良貴字葆初嘉慶舉於鄉丙戌挑一等例注知縣以母疾改湖州訓

高平縣志

卷六 人物上

三

導晝夜侍湯藥如是者歷年母卒不飲酒不茹葷三年廬於墓時有五色蝴蝶大如斗集良貴庭人以爲孝感云 郜丕協字雍民性嚴毅屢試不售遂棄去日肆力於古文詞有丐者多不應應亦不復存曰爲文不能如韓柳諸公猶弗作也縣修文廟節烈祠及南濠皆與其役兄丕固晚年喪子丕協質衣產得錢二百緡以養兄而家固不能自給也 郭位臣事繼母以孝聞性尤慷慨甲子乙丑歲薦飢以千金周郵貧乏鄉鄰德之 王忠順父老而繇得癰疾忠順與其婦孝養無方常左右之故父雖染疾十餘年得無所苦 李士英寬厚樂施予年值除夕偷兒潛伏牀

下士英知之集家人於庭呼出曰子素非賊何竊爲偷兒愧且泣曰妻子嗷嗷無卒歲資急而爲此然公置之死不
敢怨士英憐其貧與以粟五斗置諸橐綈袍一襲戒之曰
慎勿然偷兒持至家妻問所從來以實告妻怒曰此豈復
人行幸李公長者不然收矣速持橐往謝偷兒至則有死
者經諸門復歸告妻妻喜曰適感李公德無以報遂偕往
負屍懸諸北山松枝上明日夫妻往謝問士英曰若有仇
乎士英曰無有偷兒曰不然士英沈思良久曰惟里人某
早有隙已忘之矣偷兒曰是也李詢其故偷兒笑而不應
固問之以告士英乃厚酬而遣之其他事率類此 尚大

高平縣志

卷六

人物上

三

洲性誠篤兄賈羅山以誣陷遣戍浙江大洲痛兄以非辜
獲譴毀家以從繼繼配所極艱苦無怨色凡三載以赦歸
趙長江九世同居家無間言錄此終篇以愧世之兄弟
爭財而生鬪鬩者

高平縣志

知高平縣事龍汝霖纂輯

人物第六下

漢武承暴秦焚書坑儒之後表章六經崇尚儒術董仲舒以發策顯一時喁然嚮風斌斌多儒雅之選矣夫漢崇經術唐務詞章宋宗理學時所尊尚人才出焉故自西漢創立儒林傳歷史遵之後分爲兩途有曰儒林文學者則北魏宋隋也有曰儒學文藝者則唐也有曰道學文翰者則宋也有曰儒學文翰者則元也有曰儒林文苑者則東漢及晉明也故志於人物外別爲文苑亦取羽翼經傳發揮

高平縣志

卷六 人物下

一

聖賢若徒獵取采藻舍實趨華浮薄之詞曷足尚已邑文學南北朝則張文舉通春秋三傳幼負才名時士翕然宗之性恬逸不樂仕進

隋則王畧爲國子監祭酒羽翼聖教闡發微言精易象春秋及遷史

唐則張誨其先世居清河祖嘗爲和州令因家焉誨復徙居高平自號拙菴以文學名世專經術富篇韻居鄉不苟人胥稱之

宋則李大節唐福王綰之裔長於春秋毛詩尤諳天文地理之學志尙高潔恥爲一切巧僞之事里人推爲長者

李異大節孫受韻學於大愚僧著有切韻門庭

金則晁會字公錫宋文元公迥之後宣和末中武舉仕爲太子洗馬入金中天眷二年經義進士邑經靖康之亂生徒解散會誘進之貧不能就舉者厚爲津遣在官輒分俸給之李承旨晏昆仲皆出其門厯虞鄉猗氏臨晉三縣令以興平軍節度副使致仕詩號泣水集虞鄉縣齋云宦况薄於重榨酒瓜期近似欲殘碁王官谷云烟藏芳樹遠雲補斷山齊皆佳句也孫國章字公憲承旨外孫隱居教授經指授者肅然如在官府蓋其家法云 趙可字獻之貞元進士仕至翰林直學士高才博學卓犖不羈官翰林一

高平縣志

卷六

人物下

二

時詔誥多出其手常奉使高麗其詩歌樂府尤工號玉峯散人集見金史子述字勉叔承安二年進士賦雪云奇貨可居天種玉太平有象麥連雲詞章字畫皆有父風性落魄嗜酒卒以樂死 虞洵字仁甫李晏見所作上梁文賞之勉使就學年六十一登科屢官至宜陽令有政績卒於官洵少以鞏原及赤壁圖詩著名其招飲云南園仙杏腥紅破北渚宮醪玉汗醇已約樽前成二老全勝月下作三人 申萬全字百勝兄無夷萬全少有聲太學中乙科調福昌簿不赴隱居盧氏山正大中召爲史館編修從行省慶山南征道中有詩云人生行止原無定一葦江湖縱所

如不數日溺水死人以爲懺云

元則元凱有文學爲時稱譽隱居不仕以德義表率鄉閭著述窮極天人多發前賢所未發者

明則郭定質子成化進士歷知邳鄭通三州性穎異好學工詩翰登第後宰執稱其文幹兩優

國朝則王奕駒號西村康熙舉人豪俠自負以左證邑宰宋思陟貪冒獲忌於時後奕駒家僕追盜殺於途盜黨訟奕駒殺良民令鍛鍊成獄遣戍侯官閩大吏知其冤議贖金爲助軍具舟車相其歸奕駒曰是安可以吾煩冤廢

天子法重累執政不可著有丁甲虎尾集 牛兆捷字澱

高平縣志

卷六 人物下

三

洋進士少師傅山畢振姬有器識任灌陽令教民敦禮讓

課農桑裁成士類邑人建祠祀之著有陶史草十卷 牛

兆鼎字瀚洋捷弟與兄同師畢振姬博學工文有南園詩

草纂輯左傳十國紀事本末叙論評騭莊子文選及李義

山詩集繼振姬兆捷主壇坫者三十年 趙淑抃字馨蘭

廩生工於詩賦教授生徒多所成就進士畢濬家貧不能

學抃收之門下飲食教誨卒成之舉人王金鎧亦其高弟

也 畢濬字萊猗進士屢官正定府同知端雅廉靜文如

其所至有政績旣歸澹泊自甘著有知非集宦遊集晚

年自作拙叟傳爲實錄云 姬鼎燕孝廉顯廷子性簡介

工詩著苦吟集州牧陶自悅見其蠟香詠而善之 李棟
字丹崖少而能文畢振姬得其文謂棟父曰君有子若是
甯效老泉爲自苦耶及長受知博陵王公當博陵督學三
秦將出都招棟於密坐以請託函盈篋示棟曰將如何棟
曰曷勿焚令棟檢數數盡已豫覆一火種矣後以教學倡
於鄉 祁瑾字蘭懷少以孝友聞遠於史學纂通鑑編年
錄百餘卷與綱目相出入年七十猶繙閱不厭作詩不名
一家著有龍右詩句雜助等集秋興云露冷空山蘭自老
風清荒徑菊無聊 鄒承穎字敦復拔貢生沉酣經籍力
行不倦甲戌成進士授蒲郡教授課士有程立多宗之

高平縣志

卷六

人物下

四

趙瑯字遠玉性明厚爲人疎秀勤于學經史子集手抄定
本時作詩歌以自適著有安命集 趙雲漢字景畧性鯁
直不慕榮利家貧好讀書深於易理精卜筮決疑如響自
決壽終其於六十四卦悉楷書繪圖一字不苟將終命子
孫曰字可習耳非欲汝精卜筮也 李培蔭字菱石貢士
通經學善詩詞古文父鯁侍養浣滌厠膾皆躬爲之司訓
忻州講明正學著有菊圃詩草學園摹古文集 石中玉
字米袖九歲遊鄰館久之不去館師楊彤揆授之書隨口
成誦奇之教以經傳及詩賦古文詞師歿不屑屑舉子業
奇窮苦學博覽羣書著有句典摘萃中年隱於醫著傷寒

尊是血症瑣言本草談真雜症瑣言四集活人無算時稱
華董云 司昌齡字靜山貢生於書無所不研究雍正末
當事薦舉鴻博不赴殫心著述口誦手抄至老不倦著泣
文備徵泣志拾遺泣志補缺紫峰文集並選古文精華十
一史精華等書性高潔足跡不入城市二十餘年 張承
綸字錫三邃於經史百家之學辭章捷敏尤註意於詩與
從兄小渠鳳臺荀雪巖結蒲溪詩社初三子遊吳門欲謂
沈歸愚宗伯先以詩質顧花橋花橋賞之謂可抗衡晉陳
午亭吳蓮洋二家因以示歸愚歸愚謂具盛唐風格不落
大厯以後遇南士必稱之家富於書其藏書樓曰沈烟計
高平縣志

卷六 人物下

五

二十萬卷著有西軒遺詩前後集 趙溥字化光廩生性

磊犖精於醫暇輒爲詩歌著有穆三堂醫學集解穆三堂
詩草詩草今不傳傳其雁字詩三十首紀曉嵐宗伯賞之
贈詩云一氣呵成三十韻悲歌慷慨有餘音知君不是誇
才妙半寫人情半寫心 唐瀛士以拔貢舉於鄉授河津

教諭後知湖北蒲圻縣事再除福建武平縣未視事而卒
瀛士廉介不苟慎於用刑偶一鞭扑寮友輒嘲曰公儒生
亦解答人耶解官後仍以教授爲生工詩題少尉畫梅云
畫家不爲春消息報道神仙舊姓梅自嘲云折盡廣文消
受福半收原憲作門生著有寸知齋文鈔詩集若干卷

司百川字會泉嘉慶乙卯舉於鄉授稷山教諭服膺宋儒之學訪稷山辛復元黨冰壑及洪洞范彪西關中李中孚遺書手錄粹語與諸生相切劘亦能詩其暮春懷友云春歸白社思良友夢繞青山數俸錢石室山云雲氣乍收連日雨海波初送一天霞羊頭山云界連三邑稱天險勢拔干尋踞上游六年引疾歸諸生留之諭曰呂新吾有言學校非養老憐貧地六年待罪愧此職多矣敢重吾過平劉士彥號文溪貢生性嚴重博覽羣籍尤邃於詩教成弟子甚衆著有雨化軒草紫霞集詩二卷

堯舜在上下有巢由不獨世亂有棲遁也漢武嘗舉獨行

高平縣志

卷六

人物下

六

君子光武亦時賁纁帛然若薛方逢萌聘而不至嚴光周黨至而不屈至肅宗亦禮鄭均高鳳以成其節故東京氣節風乎百世雖桓靈之季閭宦柄朝而政濁於上風澄於下焉唐開元詔舉遺逸如趙贊之薦袁起韋夏卿之薦竇羣長慶之召李源皆所以獎恬靜而激奔競也宋初於草澤求賢良而如陳搏之高曠种放之恬逸非軒冕所得而羈負乎泐矣明太祖搜求岩穴至置不爲君用之罰然士各有志沈淪不返者究無得而繫焉邑之隱逸宋則張宗古幼負大志優於文學父母早沒或勸之仕曰仕以行志也親老而養不逮吾志安乎居恒樂善喜施嫁宗之孤女

五人瘞貧乏不能舉者十餘喪宗族兄弟有官本郡者屏居山澤不一造其門旣罷情禮款洽如初云 張克柔以理學爲宗性爽慨重然諾屏跡山林布衣蔬食處之淡然顯達每顧其廬苟非其人則辭而避之 王照質樸有古人風爲學不事章句深居屏迹灌園種樹以終老每接人必稱說格言鄉里感化無少長咸親之

元則李希白有駿才時當元季謂鄉人曰此忠臣義士奮發之秋吾力不能而復覩然事之恥也遂屏居無仕進意張起巖號東崖性嚴重與人寡合獨與韓維學游爲忘年友同隱龍山維學嘗語人曰張東崖宋魏野之流也日

高平縣志

卷六

人物下

七

益放歌自得著有泣水唱和集維學亦高士有野川文館碑 張才與兄播齊名恬退不仕嘗種瓜自給有竊瓜者反爲之開棘其人慚謝 張汝弼事親孝以詩名世遁跡莒山嘯歌獨行性喜薇自號薇田顏其室曰薇齋 韓嗣宗號丹川隱士故志未詳其事跡亦高流也

明則陳錦性高鯁幼習舉子業恥事勦說後隱西山麓曰修不必耀貴不必爵知不必人行不必身竟以此自終

國朝則趙蔚字知岑志端而行方隱居絕意聲華博覽載籍尤潛心性理之學旣老日玩易象及春秋傳熟於史氏歷朝成敗興廢之端皆能提其綱於程子鄉校之陰隙地

構齋曰端本平生寡言笑年七十卒司靜山誌其墓稱爲
眞處士云 張恂陝西涇陽人進士因李闖亂潛避高平
遨遊山谷以嘯歌自適 宋霸城武人進士避李闖亂居
高平陳堰村登臨閑適有傷然出塵之想

漢志曰數術者明堂羲和史卜之職方技者生生之具五
官之一守也自馬遷作史記傳日者龜策扁倉范史因爲
方術立傳雜技者流遞相祖述不絕於時矣晉隋曰藝術
唐明曰方伎其精者亦能通物方而弘時務而失之迂誕
蓋亦有焉嗚呼非達於至道烏能崇修以濟時隱身以利
物者乎邑之以藝術鳴者元則李肯堂巧思強記善楷書
高平縣志

卷六 人物下

八

及篆籀之學有西溪法帖行世

明則陳魯少學易入五臺見老翁授開心符魯跪吞之遂
明卜筮陰陽九宮兵法風雨無不立應 王友古博物洽
聞尤精天文及九章法且布算而知人之隱嘗集渾天欹
器銅鳥漏刻候風諸巧製並圖之以爲準 李玘少以醫
著後善圖緯且能煉形服氣晚年彙釋老而一之

國朝則三銅道人不知何許人諸生成周佐母病喉百藥
罔效一道人過門索蔬具見之曰喉有祟吾爲子手療否
且殆矣擊所持棕扇柄出紅丸七令吞之又彈頂後吐數
肉蛾蠕蠕動旋納之袖中語周佐謝我銅三觔足矣入室

取之出則失道人所在殆非世人也爲作三銅道人傳
祁惠之上黨人善醫邑人仰賴者衆因卜居於城北村古
籍焉子芳幼聰敏好學其父與講論脉理輒會悟弱冠徧
覽羣書無不通貫療治多效徵請盈門不擇貧富 牛彬
棄儒而醫精其術第診脉卽狀其疾與病者合故治無不
效或道遠不能往則來者告以狀爲之方十不一誤造門
者日絡繹彬廉不受謝但令隨其意簿籍之爲修剝費不
數年積錢巨萬村廟爲立新焉

昔劉向劄爲列女傳所著列者多庸德范史宗之而搜次
才行亦不專節孝也魏晉而降取惟一操矣漢世有表閭

高平縣志

卷六 人物下

九

之典唐宋尤隆其教故以節烈彰者稠於史冊明更令巡
方督學歲上其事優者予祠祀次亦爲樹坊表 國初更
有立祠近學宮之 詔風教所驅雖閭里糟糠之婦鄉曲

伶仃之女曰不識詩書皆知勵潔白而恥瀆亂 國制所

褒徽美勿替焉故志載自元益以道光同治所旌者凡七

百三十一人年或未符而含辛茹苦奇節可貞者亦綜錄

之所以勵後也元則張珊妻曹氏年十九珊亡遺孤甫一

歲姑有贅婿利其貲陰與妻謀鳩兇以絕曹望曹心動寄

兇母家曲意慰其姑凡五十年贅婿死兇亦斃成立 張

國用妻許氏 段傑妻姬氏 李鳳妻王氏 王平妻張

氏 明則張友讓妻王氏 李韶妻祁氏韶亡舅姑欲奪其志氏以死自誓竟不敢逼 王子章妻李氏章死氏欲殉未果值兵亂携七歲兒避難山谷間卒免 邵深妻璩氏深死家貧晝夜織紉以供衣食有巨姓擇遷慕其賢欲致之不可歿後墓產紫芝二縣令劉鳳池有詩 邢琰妻李氏琰早死貧甚親黨諷以別適氏曰姑在孰與爲養耶吾守吾貞而已 生員陳鳳妻李氏漢陰知縣陳輔之母李氏女幼受尚洗聘未娶洗往滇不歸女誓不改適以禮歸尚事姑篤孝洗竟客死典衣飾舁骸骨歸爲同棺之穴嘉靖間邑令傅思明表其行立祠祀之 潘文明母王

氏夫死自經室中者數矣家人迹而救得不死族黨勸之曰上有母而下藐諸孤死何辭謁爾夫於地下乃彊起家貧操苦供甘旨翁姑以天年終四孤成立萬歷時得旨旌之氏聞詔拜泣曰未亡人不早從穴而偷視息以博非望之榮愧死矣則又顧文明曰吾何知稱塞獨藉孺子尺寸耳 廩生郭峻妻田氏峻死欲殉之父勉以忍死撫孤姑妬伎將奪其志氏不從子紹芳娶申氏貴家女曲盡婦道食貧作苦孝養媪姑生子東田年六十九將終曰郭氏四十年一綫之緒得以不絕幸遇賢婦產佳兒吾良人目瞑矣 邢光裕妻邵氏裕負矢戍邊死於陣氏典衣取屍歸

殞畢自經一女亦從死焉 牛學孔妻張氏孔疾篤以百
金與張曰爲爾後日計氏自忖脫不幸有死而已金何爲
夫竟死氏投繯柩前 龐暘妻陳氏 舉人邢國庶繼室
趙氏適邢一載而寡姑齒老前妻二子待哺氏食貧教子
奉姑終身不衰 張朝相妻李氏年十八相死子二艱虞
萬狀甫長長子嘉祥娶李氏次子嘉瑞娶賈氏後兄弟相
繼死一姑二媳誓共守俱以垂白終 宮詹劉虞夔妾畢
氏夔卒撫嫡子元徵於襁褓禦侮全孤歷三十年不改
牛天賜妻梁氏進士牛強元母 李經邦繼室王氏 馮
坤妻田氏 李時漸妻張氏漸素貧歿無以殮氏百計營
高平縣志 卷六 人物下 十一
之後以女工度日教子藻成名 姬佩林妻郭氏生子甫
三日而林歿氏矢志撫孤子國澤官黃州知事 廩生牛
星妻薛氏 李嘉言妻張氏十九喪夫遺孤數月兄欲以
爲利氏截髮自誓勤女工撫幼子垂五十年 郭守恩妻
孟氏 趙金妻李氏金客死氏聞訃哀痛幾絕託所親携
櫬歸拮据營葬姑性嚴氏曲盡孝謹能得歡心 常太妻
張氏太亡舅姑年邁子方襁褓或勸其改適氏曰老幼將
誰依耶誓不從 郭思恭妻關氏年二十恭亡氏方有娠
舅姑衰老氏朝夕奉侍生子悉心撫養以延夫祀 李大
勲妻王氏 郭治禮妻畢氏 何春妻王氏 張孟秋妻

李氏年十九秋亡困苦食貧四十餘年未嘗怨悔 郝慶妻李氏 李佩妻朱氏 牛漢妻苗氏年十九漢亡長齋繡佛粗糲終身 秦自立妻李氏 韓希愛妻王氏 馮四端妻秦氏夫亡撫孤應元娶牛氏元亦早歿牛年十九姑婦撫孤孫昌祚無二志 李濬澤妻田氏 吳守志妻劉氏

國朝則監生李棠繼室田氏己丑夏賊人張斗光劫掠氏避亂東莊煤窰賊薰攻甚急窰陷被執氏罵曰吾以名門女適德門豈從汝賊露刃脇之罵愈厲遂死 焦薰母焦氏其夫明季守汴以流賊決河灌大梁殞焉氏更大兵大

高平縣志

卷六 人物下

十三

荒大疫力翼其孤屢危獲全 鞏攀桂妻張氏 生員趙

建紀妻王氏夫死殉之遺一女弗顧也 孝子袁潔母朱

氏年十八守節八十乃歿潔廬其墓 趙之秀妻程氏年

十九夫死姑以家貧氏幼迫令改適氏給以服除及期姑

僞携往女家道逢數人目逆氏氏覺遂中道歸至夫冢一

痛而縊 張珽妻王氏幼失怙恃育於嫂年十六歸珽珽

亦少孤依舅氏以居氏婉婉順從越十載珽遘疾篤慮婦

少無依氏泣曰君脫不諱我忍獨生耶及珽卒殮訖氏闔

戶自經面柩而立 庠生李德恒妻秦氏年十六適德恒

孝敬有婦德越十二載夫病革氏泣語曰君無爲我念我

必以死殉恒卒既殯氏以頭觸棺幾死家人守之後乘間自刎死氏兄訟之官凡六月讞平始殯面色如生 庠生李業偉妻田氏 李彪妻王氏有子四夫亡欲從地下姑曰既爲彪也妻宜爲子也母不爲子也母愧爲彪也妻氏感泣撫孤以終 李永欽妻楊氏舉人李焯母也 陳尚志妻李氏 陳紀妻李氏 胡璣妻常氏 庠生楊上林妻秦氏夫亡無子舅姑老竭誠以養舅病衣不解帶者三載十年始立嗣焉 緱獻儒妻張氏 陳緒妻李氏 武光啟妻王氏 段琬妻吳氏琬病藥罔效氏刲股以進疾遂愈後生子甫三歲琬病死氏引兒置女君鄭氏前不食

高平縣志

卷六 人物下

十三

月餘死 靳永科妻牛氏夫亡事舅姑孝撫幼子甫成立復亡與媳共守沒齒無怨 郃文龍妻王氏 生員裴士超妻秦氏夫亡無子繼姪爲嗣鞠育不異已出事舅姑處娣姒無間言 武甯基妻李氏家貧盡婦道夫不任事藉氏十指爲生活父以甯基愚逐爲僧勸氏改適氏聞以履授甯基曰若不復著此履矣乃縊 靳王前妻李氏 常煜妻李氏年二十四煜遠遊不歸氏奉姑嫜撫弱子憑織絰以資朝夕姑亡哀泣損其目獨處五十餘年夫竟不歸而死 貞女秦氏鳳臺太陽鎮人許配武廷詔年十六未婚而廷詔死女辭父母奔喪成服事舅姑克行婦道 馮

琴信妻李氏夫亡氏年十七忍死生遺腹子撫有成之

王元妻李氏歸元七載元客死於豫子甫三歲氏自度育子不若從夫投繯死 李繼仁母常氏 庠生畢多福妻牛氏多福亡自矢必死家人守勸之啣哀營喪葬乞叔子以爲嗣 袁瑾妻杜氏生一子瑾病篤謂曰袁氏四世單傳今僅存此子若再醮幸存一脉氏咬舌出血誓無他志瑾卒氏侍姑訓子有勸其改適者氏截髮毀容以謝焉

生員程六韜繼妻趙氏 王國璽妻李氏 生員張鐸妻李氏 增生崔偉峨妻程氏 邵錫妻李氏年二十錫亡遺腹生子織維自給 申發成妻師氏 生員龐嗣煜妻

高平縣志

卷六

人物下

十四

韓氏夫故撫遺子成立子死復撫孫以迄於老 生員張

淡母連氏 連慎濟妻王氏姑死夫痛母亡氏殮夫畢亦

縊死 甲禹安母李氏 張肇萬妻常氏 李永法妻郭

氏 邵綸音繼室緱氏 李海妻烈婦范氏海遠出姑命

往王元家索逋穀元誘閉之窰中求姦不從以磚擊之斃

割其首女往尋母並害之事發抵王元法 烈女張四姐

年十三母兄他往鄰人宋起生欲姦之四姐哭罵不已鄰

婦勸止四姐羞忿不釋乘母他出自縊死官執起生罪之

烈女郭大則郭文忠女年十五往地摘瓜豆遇同里張

保全誘至僻地強姦不從保全將鑊傷其頭頸去父覓負

歸越二日死保全置諸法 明月妻趙氏十九歲而寡子在智妻亦趙氏二十三歲而寡同守幼子四十年同歲卒
王欽妻李氏 牛鑰妻閻氏 武生陳珣妻韓氏夫病割股啖夫夫歿守節撫孤紡績自贍 生員常琰妻劉氏
陳錫遠妻張氏夫死殯畢卽闔戶自經家人救得免未數月卒嘔血死 宋枋妻楊氏 袁蔭召妻姬氏夫死無子屢縊以救得甦父母勸其以奉哀姑爲重後姑死五日氏仍自經 靳養蒙妻王氏夫亡遺子二歲族黨逼其改嫁氏嚴責之 李萬錦妻姬氏 監生緱澍妻常氏 貢生緱樸妻閻氏其女緱氏適馮涓皆夫亡守節以沒 劉

高平縣志

卷六 人物下

五

玥妻陳氏玥卒無子矢以身殉家人防衛不果立嗣子撫育若已出 生員祁斯源妻張氏夫死無子舅姑爲立嗣後子復死氏悲痛抑鬱而卒 馮四達妻王氏其子昌婦郭氏 監生楊邦佐妻李氏 田聰妻楊氏 張映奎妻郭氏夫亡自縊死 朱有文妻閻氏 鄭文沼妻趙氏 畢霽妻邵氏夫歿舅姑年老恐死侍奉繼姪爲嗣焉 監生楊上楨妻張氏 史子英妻楊氏生員載言母子英雙瞽氏歸後無怨言英死子五歲氏上事舅姑下撫幼子終其身 馮鼎衡妻張氏 張氏女幼許字牛氏子女年十九而牛氏子亡女聞暗泣父母改字靳氏女誓曰願作牛

氏鬼不爲靳氏婦親迎有日盛服投繯死牛氏舅姑是夜
夢女至其家 閩鉉妻李氏 庠生陳天錫妻王氏 杜
海吾妻郭氏 鞏碧妻宋氏 陳苾妻張氏 楊貢金妻
張氏夫故舅姑老氏無子念死難塞責養葬二親苦節孤
守以卒 馮銳妻李氏夫歿撫育子女後子婦繼亡遺孫
九歲鞠育成立姪女二一適畢中式一適邵從起俱以守
節著時相語曰李氏之廬姪如其姑云 李爾顯妻劉氏
鄭君弼妻焦氏適鄭五載夫亡遺子甫二歲矢志事孀
姑姑沒投繯死 孫永祜妻馬氏祜歿於旅氏聞哀痛幾
絕嫂氏以子嗣之 楊光顯妻焦氏 陳斌妻楊氏 明

高平縣志

卷六

人物下

夫

五典妻李氏

王魯妻張氏魯弟樸妻張氏

生員陳景

鐸妻焦氏

常曙楨妻王氏

焦美祿妻李氏夫故遺子

甫六歲矢志撫孤子復故遺妻張氏夫婦勤苦以度日

尚永壽妻邵氏嫁甫五月而夫歿氏投繯獲救免繼嗣承

襁撫如己出

馮名世妻畢氏

李子馨妻王氏

邢瓊

妻楊氏

石瑄妻史氏

邵近仁妻趙氏年十九夫故遺

腹生子氏事舅姑撫幼子節操逾厲

武生朱聯璧妻畢

氏年二十璧故子女俱無奉親孝謹撫育繼子有方

李

美幹妻秦氏

申發貴妻邵氏

馮永福妻張氏

李銘

妻張氏銘亡無子自經爲人所救繼姪爲嗣

庠生李美

玉妻張氏 孔文獻妻郭氏 田俊妻石氏 趙經妻張氏
氏經亡遺二子俱幼家計蕭條苦守撫孤長子復亡教育
幼子久乃成立 李培寶妻邵氏 楊錢妻栗氏夫死舅
老子幼家貧如洗氏勤紡織以供馨膳無少闕 王光燦
妻郭氏 邵世亨妻張氏 監生秦潤妻王氏夫亡遺子
甫一歲氏零丁孤苦爲子娶婦趙氏未幾亦亡遺二子俱
幼黽勉同守 賀忠顯妻郭氏 李履忠妻張氏 姬述
誌妻崔氏 增生趙建業妻楊氏 常珮妻王氏 呂應
鐘妻張氏 段文龍妻李氏 楊映璋妻秦氏 鞏謹妻
秦氏夫亡遺二子俱幼氏撫子成人長子娶張氏復故遺
高平縣志

卷六

人物下

七

二子張氏奉姑撫子不愧姑婦云 孫蘭妻畢氏 郭承

玉妻孫氏 程懷信妻趙氏 畢多修妻張氏 李財妻

郭氏 楊上體妻張氏 賈惠麟妻袁氏 緱文燦妻趙

氏 郭洪基妻李氏夫亡遺腹生子家貧氏上事孀姑下

撫穉子十指經營不贍朝夕 張旂妻李氏 李培標妻

璩氏夫亡遺子從仁培標弟培賢妻馮氏妾邵氏賢亡遺

子秉義妯娒艱辛撫育二子成室從仁秉義復相繼亡仁

妻張氏義妻李氏相誓同守兩世五孀人爲淒惻 趙思

聰妻田氏 張啓聖妻邵氏夫亡遺子女幼弱孤貧無倚

有勸其改適者氏曰吾粗知大義豈肯以存亡易心哉

宋映卿妻楊氏 貢士郭承儀妻朱氏 李銳妻李氏
李鴻儒妻緱氏其子士麟妻張氏 郭銓妻張氏 岳維
淮妻車氏夫故遺腹生子家貧鍼指資生 李光榮妻王
氏夫亡遺一子八歲氏撫養成立娶妻生子夫婦復相繼
逝遺孫士鈺娶張氏生一子二歲鈺又亡二寡相依張氏
紡績以養王歿張亦隨殞 師錫藩妻王氏 生員邵煥
荆妻申氏 庠生許汝岍妻丁氏 邵維雍妻陳氏 石
灝妻李氏 生員郝廷鉉妻邵氏 緱龍光妻張氏 邵
貴珍妻馬氏 李璵妻袁氏璵亡遺腹生子氏撫育恩勤
靡懈子先亡哭之喪明 生員楊池妻郭氏 李淮妻崔
高平縣志

卷六

人物下

六

氏淮故遺二子二女氏紡織自勤苦志以成婚嫁 趙萬
福妻王氏夫故上無依倚下有孤子氏食貧茹苦撫子授
室子又故婦改適撫二孤孫垂老益窮 栗法妻馬氏
王明德妻王氏夫故遺兩子一女未幾長子及女復亡舅
氏逼之改適氏至剪髮自誓 楊自起妻段氏 閻慎公
妻侯氏其子君輔妻邢氏 常維翰妻趙氏夫亡舅姑衰
暮有女無子姑性最嚴氏委曲以爲孝養 吳君佐妻邢
氏 牛宗祺妻畢氏 田思義妻安氏夫亡遺子一齡守
節撫孤茹苦自甘子婚娶亦亡與婦賀氏撫幼孫拮据度
日 王德運妻張氏夫亡弟德玉妻韓氏後亦雙亡遺子

楚氏撫養之 杜蕊妻王氏夫亡恐死奉舅姑爲稚子婚
娶生子未幾子亦亡與婦同撫孤孫焉 李朝印妻秦氏
王臣妻車氏 監生李安仁妾馬氏夫死嫡亦亡獨遺
一女氏欲自盡族人爲立嗣氏恩養備至 田開文妻趙
氏 畢有銀妻王氏 康子選妻張氏 田牧民妻武氏
牛子霞妻范氏夫故上有舅姑與祖子甫四歲饗殮莫
繼人勸其改適氏曰是禽獸也食貧艱苦事老撫幼始終
如一 李作賓妻璩氏夫故遺子二歲氏自縊以救免軫
念孤兒紡績鞠育之 李而理妻牛氏 李德金妻明氏
郭存義妻史氏 李培英妻田氏夫故遺一子三女俱
高平縣志

卷六

人物下

幼舅姑衰老氏仰事俯育後子婦三女俱不永年痛子憐
孫老節彌苦 常景捷妻馮氏 李生福妻王氏 庠生
牛宗仁妻劉氏 郜從禧妻李氏年十九夫故欲以身殉
不飲食者三日復念舅姑無依繼嗣未立起養兩親撫嗣
子以終其身 李國相妻鄭氏 王廷賓妻李氏 李增
盛妻吳氏 王雍妻李氏夫歿遺子六齡勉事病姑藥餌
必親曉夜不怠姑歿積痛成癆 生員郜錫仁妻靳氏
宋悅妻賈氏 孝女程蘇氏父德行病篤醫藥罔效女因
截左手第五指煎與父服後夢神曰得項肉可全瘳女又
割左項肉以進病果愈 王滌妻田氏 王培昇妻郭氏

原大有妻暴氏夫歿無子氏約夫弟大豐生子爲嗣旣
生弟婦難之氏不強次子生又難之氏曰不以爾子嗣有
死而已抽刀幾自斷其喉遂立嗣爲夫營葬刊石立碑預
書合穴奉祀焉 馮泗宗妻畢氏 李宗禮妻王氏 王
士榮妻陳氏 馮兆麟妻王氏 袁大財妻秦氏 秦璧
儉妻李氏夫故撫遺子二成婚次子早亡婦守節亦效其
姑 丁詔妻李氏 常浦蒼繼室趙氏 生員李子建妻
趙氏 田濟民妻賈氏年二十夫故無子父母勸其改適
氏焚香柩前刺指出血爲誓伯氏以子嗣焉 段如傳妻
李氏夫亡子甫七歲苦無依倚悲傷撫子雙目失明 趙

高平縣志

卷六

人物下

二十

子敬妻張氏 暴溫惠妻王氏 崔元泰妻張氏 楊佐
財妻王氏 畢申道妻王氏 王太雷妻宋氏 郭浹妻
姬氏 郭治田妻郭氏田亡遺子三歲父欲奪其志氏曰
姑老子幼依倚何人兒不敢也 優生趙爾明妻申氏夫
沒子甫三歲矢志撫成子復不祿 畢寶重妻趙氏婦秦
氏其弟實好妻李氏婦郭氏一門四嫠婦不幸甚矣 張
鐸繼室韓氏 李中和妻安氏 王怵妻袁氏夫故子甫
一歲舅年老氏立志撫孤事親嫂氏遺子女並撫之 馮
學禮妻李氏 張士魁妻李氏夫亡生子甫五月氏忍死
奉舅姑撫弱子荼節自甘 王金璽妻張氏年十九而寡

遺腹生子家計寒薄爲子婚娶復亡年逾七十煢煢獨守
楊聲溥妻郭氏年十九于歸三月而夫亡氏守節不渝
繼子攀桂娶郭氏桂死婦亦事孀姑以老 陳源繼室袁
氏夫故遺前妻子甫三歲氏撫如已出年邁子復故惟婦
存焉 畢得紳妻唐氏其孫中彬妻李氏 張鳳乾妻常
氏 郭錙妻魏氏 郭伏龍妻申氏 王佩妻張氏 王
若陶妻王氏 趙魯瞻妻李氏 賈致中妻劉氏年二十
夫故氏孝養舅姑撫繼子家貧勤女紅不少輟 賈洪妻
祁氏 邊闕妻李氏 楊榮妻崔氏 孫發起妻王氏
武生尚玉珠妻李氏 景德妻王氏 靳禮妻李氏夫亡
高平縣志

卷六

人物下

三

閩五月遺腹生子氏殷勤教養 趙繼周妻常氏夫亡子

增甫七月氏孝事繼姑撫弱息成立中年增復亡督諸孫

舉四世喪支持門戶艱苦備嘗 趙修妾林氏修納自揚

州偕至家生子皆殤修亡氏求族子爲嗣旣婚娶復死更

嗣遠族子族有無賴欺凌百端氏介然不易其操晚益貧

窶 薛志魁妻王氏年二十生一子而夫卒氏晝夜紡績

率同堂諸娣姒共勞苦若忘其爲孀居者其叔儒生某以

改適勸之氏泣曰叔父讀五經四書人也吾而寡是吾命

也幸有子女吾不撫吾子女而棄之旣背死者又不恤生

者吾生不如死叔慙而退 烈婦王民隲妻龐氏里有惡

少以戲言誘之羞忿不已遂自盡

有司表其閭而未旌於朝者則祁樂繼室崔氏 劉攀龍

妻史氏 皇甫其科妻牛氏 皇甫其茂妻秦氏 高彬

妻成氏 侯蘭芳妻趙氏 楊生妻連氏 程司鐸妻趙

氏 侯爵妻王氏 杜英妻趙氏 吉東亮妻張氏夫亡

族人逼其改適將氏物掠取一空氏堅忍弗從以針帶給

饗殮焉

道光朝請旌者則王永恒妻郭氏 廉景伊妻董氏 王

秉禮妻李氏 王國輔妻劉氏 王德平妻李氏 楊陞

妻焦氏 趙國梁妻袁氏 劉諒妻郭氏 許方肅妻牛

高平縣志

卷六

人物下

三

氏 魏敬修妻郭氏 張海濬妻陳氏 武生郜培燕妻

李氏事舅姑以孝聞夫亡無子遺一女氏恒自誓曰夫亡

而不能事夫之父母非孝也夫無子而不能撫兄弟之子

爲子非慈也時夫弟尚幼越四十年始如其志 賈文爛

妻申氏適賈一年而夫亡上無舅姑下無子女零丁一身

依族母袁氏以生 監生李儼妻王氏 龐立棠妻李氏

李滄妻楊氏 皇甫子敏妻趙氏 皇甫化滔妻張氏

張萬年妻常氏 司全燿妻丁氏 張鄒嶧妻焦氏

張學詩妻倫氏 郭時乘妻劉氏 監生郭立妻宋氏

庠生田如登妻李氏 牛崇德妻李氏 李芳薇妻司氏

邢懷珍妻劉氏 秦國安妻史氏 李汝權妻司氏

庠生田振齊妻秦氏 常有容妻賈氏 劉錫嘏妻李氏

郭嘉穀妻張氏 牛秉讓妻王氏 郭占鰲妻申氏夫

買故他鄉家貧無以為養前妻子尚幼氏忍死撫孤子長

迎夫櫬歸葬焉 監生張炳炎妻任氏 劉廷楷妻常氏

李宗白妻楊氏 周淦妻吳氏 張讓妻賈氏 楊錦

妻杜氏 武生李亮妻成氏 邵林春妻王氏 常以安

妻劉氏 李成業妻張氏 史琇妻李氏 王錫朋妻林

氏 楊傑妻牛氏 牛太常妻侯氏 常珍妻張氏 吳

世魁妻張氏 畢迎祥妻牛氏 吳化峯妻張氏 李繡

高平縣志 卷六 人物下 三

錦妻張氏 姬海涵妻李氏 楊芳妻連氏 宋補祥妻

邵氏 宋恩浦妻姬氏 宋天富妻秦氏 解國號妻李

氏 蘇繼志妻靳氏 崔興盛妻張氏 張錦榮妻崔氏

庠生李大謀妻畢氏 程緒孟妻王氏 牛中麟妻鄭

氏 侯武妻劉氏 趙棐宸妻明氏 李思信妻吳氏

監生李思禮妻郭氏 秦季麟妻焦氏 李志瀛妻宋氏

畢玉成妻張氏 秦如虹妻郭氏 朱紫貴妻唐氏

庠生王全德妻邢氏 焦良驥妻趙氏 張洪温妻萬氏

張化南妻秦氏 姬九翔妻蕭氏 貢生李宗伯妻袁

氏 趙撫育妻李氏 王敏妻姬氏 李世觀妻陳氏

李秉全妻周氏 王德理妻郭氏 陳瀉妻范氏 田鏊
妻馮氏 趙銓妻馬氏 李自寶妻常氏其子世龍妻安
氏 楊振基妻鄭氏其姪錦泉妻殷氏 張煥妻焦氏
張瑞臨妻廉氏 常吉妻李氏 常瑛妻申氏 郭大用
妻王氏其孫樹基妻李氏 王克舉妻姬氏其子體一妻
牛氏 李模妻陳氏弟婦司氏李格妻 李楠妻郭氏其
子貢生瑛妻吳氏 張世祿妻趙氏其弟監生士麟繼室
章氏 郜丕遠妻李氏 王海妻許氏 賈增祥繼室鄭
氏 牛燦章妻馮氏 袁中和妻廉氏 王啟賢妻張氏
袁越妻李氏 庠生秦萬選妻成氏 牛天久妻史氏
高平縣志 卷六 人物下 五

黃永武妻楊氏 郭翰舉妻李氏 張毛則妻趙氏
馮保盛妻明氏 劉官懋妻王氏 郭允資繼室安氏
常福旺妻牛氏 王隆妻張氏 范好敬妻張氏 張廣
俊妻李氏 廩生許天寵妻楊氏 常文煌妻張氏 師
杏誨妻李氏 石大智繼室牛氏 畢綏定妻李氏 史
萃利妻李氏 成維義妻牛氏 王天福妻司氏 焦浴
廉妻袁氏 賀如棠妻王氏 丁繼曾妻孫氏 蕭永熹
妻馮氏 宋其忠妻劉氏 王作弼妻侯氏 楊增盛妻
王氏 宋存儉妻郭氏 常永溫妻楊氏 張寅妻胡氏
蘇鵬科妻李氏 張德裕妻李氏 丁原妻朱氏 邵

林妻周氏 監生楊自強妻郭氏 閻綬妻牛氏 牛彪
妻米氏 閻維妻李氏 常殿颺妻袁氏 賈由會妻鄒
氏 常萬庫妻邢氏 高榮昌妻郭氏 郭銑妻李氏
馮大興妻黃氏 馮良妻霍氏 靳錫妻李氏 宋明德
妻郃氏 韓拔達妻祁氏 庠生靳文超妻成氏 秦灝
妻趙氏 侯法根妻韓氏 武舉常大凝繼室趙氏 牛
岱妻牛氏 秦鵬妻靳氏 武生賈培妻宋氏 賈繼貞
妻喬氏 王廷揚妻李氏 王廷榮妻馮氏 吳有和妻
楊氏 李步瀛妻劉氏 王廷授妻李氏 蘇繼敏妻侯
氏 夫亡子幼及壯亦死遺孫六歲舅姑年邁弱弟幼小氏
高平縣志 卷六 人物下 三五

撫孫事親不辭艱悴 靳從枝妻秦氏 侯永福妻葛氏

夫歿於豫二子尚幼氏往迎夫喪事姑撫子如是者數十
年 張明芝妻靳氏 陳建君妻蕭氏 牛璠妻丁氏

張永吉妻楊氏 常鏌妻張氏 趙述祖妻公氏 李士
奇妻許氏 郭錫昌妻王氏 王恒達妻郭氏 王培桂

妻李氏 姬桂妻趙氏 趙炳興妻牛氏 祁汝熒妻秦
氏 趙永明妻栗氏 大名入永明納焉越七年而永明死

永明父患癱疾飲食藥餌惟氏左右之 楊儼妻師氏
宋存義妾馬氏 張永溱妾李氏 郭嘉謨妾張氏 馬

興華妻霍氏 貢生賈榮舉妾宋氏

其以烈著者則皇甫秦氏牛氏夫爲羣從兄弟同賈於外
死焉牛氏聞之立自盡秦氏曰吾將俟吾夫歸矣夫櫬至
亦以身殉 王秉忠妻任氏夫遠遊不歸王胡保欲姦之
堅拒不從遂勒而死官弋胡保伏誅 李存枝妻史氏夫
以喪父母負逋多家計逾窘氏紡織以爲活無幾微怨色
後值年饑夫謂氏曰留爾則無生理鬻爾則兩全盍行乎
氏不語嗚咽而已夫鬻諸人既成約矣氏聞投坑死 李
保興妻季氏嫁甫五月而夫故氏求死不得聞明年元夕
自縊死 武生郭維洲妻申氏夫亡投縊自盡 韓鎮妻
朱氏入門一載夫以疾亡氏哀痛不已不食卒 李新則

高平縣志

卷六

人物下

三

妻焦氏因鄰人李庚德調姦不從羞忿投井死讞定置李
庚德於法 宋銳妻李氏夫亡日夜涕泣每食必先供其
夫姑恐其死也防之甚嚴值姑他往乘隙將殮服用線穿
綴之洋洋如平時忽一日服毒家人以爲疾也延醫治之
氏不肯服藥曰能速吾母來一見足矣竟死

同治五年余所旌者已故則史源經繼室牛氏 貢生郭
大道妾劉氏 增生李醴泉妾季氏醴泉妻患癩疾氏晝
夜調護不解帶者年餘夫歿撫子孫以恩家故不饒十餘
口衣食皆氏十指申出也 姬紹齡妻蘇氏 霍映妻畢
氏 杜恪慎妻畢氏 杜有德妻李氏 祁汝熊繼室牛

氏 龐應斗妻張氏 趙小道妻馮氏 馮汝芝妻李氏

祁埭繼室崔氏事舅姑孝夫疾請以身代不獲則茹志撫孤子之銓官於江南次三俱成立 吳廷業妻常氏

吳永芳妻袁氏 祁之鈺妻于氏 吳永恒妻秦氏 姬

錦春妻靳氏 張翥妻邵氏 宋泉妻李氏夫亡氏痛不

欲生姑勸之曰俟我死爾則死氏收淚以爲養沒身不衰

宋潤妻趙氏 袁護妻焦氏 袁孟秋妻祁氏 袁東

海妻趙氏 秦涇川妻李氏 祁蓮峯妻劉氏夫亡事姑

姑患腿疾起居以人氏朝夕扶持無倦色 牛進通妻侯

氏 李如芬妻季氏 秦守儉妻楊氏 張克恭妻章氏

高平縣志

卷六 人物下

七

夫沒子甫三歲隣人有勸其改適者氏曰是非人也我何

忍爲之勤女工以資衣食 趙蒼林妻賈氏 郭維鏞妻

吳氏事舅姑婉順無忤夫與姑同時疾氏晝夜扶侍湯藥

不少懈姑沒鬻奩以助喪夫亡後家益蕭條氏一身支持

門戶課子成立卽土墓也 姬煥文繼室桑氏 丁秋林

妻張氏 張兆瑞妻郭氏 王啟明繼室趙氏 朱德璽

妻成氏 司淵妻劉氏 馬興順妻田氏夫歿遺孤尚幼

孀姑年邁家僅瘠田三畝歲祴斗米千錢氏以饘粥養姑

已與二子煮野菜雜糠粃食之 馮正玉妻田氏夫亡氏

悲痛瀕於死舅姑諭之曰吾兩人老矣爾死誰撫孤者氏

乃爲之強起 趙志超妻焦氏 李玉麟妻侯氏 郭秉
仁妻程氏 楊林妻王氏 郭廣成妻秦氏 王文炳妻
任氏 李永慶妻璩氏 王彭德妻李氏 秦任妻李氏
夫沒子幼父母勸之改適女曰好女不嫁二夫女豈敢違
耶 陳忠妻董氏 申承先妻田氏 張運泰妻牛氏
胡紹舜妻何氏 袁廣基妻武氏 王蔭槐妻蘇氏 王
德俊妻李氏夫亡遺子甫一歲姑染沈痾氏侍湯藥三年
沒復鬻釵環以殮焉 李琇妻牛氏 郭玉成妻申氏
王汝恒妻楊氏 常君鑑妻陳氏 常金海妻李氏夫賈
於外舅姑相繼沒氏竭力殯葬夫亡遺子皆幼家極貧賴
高平縣志

卷六 人物下

三

氏以存活 賈葆元妻常氏夫亡氏勺水不入口者三日
姑垂泣謂之曰汝志良佳然汝死誰養我感姑言強食奉
姑姑沒悲痛而卒 傅熠妻孫氏 李德冒妻連氏 李
德昌妻陳氏 邵良弼妻王氏 李其英妻崔氏英亡子
亦天與叔同居叔耗其家財殆盡氏茹苦自甘沒齒無怨
楊還九妻王氏 王士奇妻李氏 王明六妻牛氏
璩容輝妻武氏 李鉅妻喬氏 張振聲妾倪氏 郭慶
安妻馮氏 尚邢鎖妻許氏 郭鳴遠妻秦氏
今尚存者則張寶爐妻李氏 張玉樹妻郭氏 邢建德
妻李氏 賈文祥妾張氏夫沒鄰有勸其他適者氏忿甚

乘間自縊家人救之乃甦 王希賢妻楊氏 廩生張敬
紳繼室鞏氏事孀姑甚謹姑疾朝夕不離側撫前妻子如
已出子沒復撫其孫爲之婚娶 郭環妻賈氏夫沒舅姑
皆近八旬子生九日念一死不足塞責強食以事親撫子
慰其亡夫焉 史克成妻畢氏家故窶貧夫沒勤女紅以
奉孀姑姑性烈少不遂意輒怒罵氏順受無怨言 邵麒
紱妻李氏事舅姑孝夫沒家漸落舅久患痢氏日爲澣滌
踰不以爲穢晝持門戶夜則篝燈操作漏四下始休 張
淇妻董氏 李誠溫妻侯氏事舅姑以孝聞於里黨夫沒
氏常飲泣不敢號恐翁姑聞而益傷也 李安仁妻季氏

高平縣志

卷六 人物下

三

夫亡家窘甚氏糟糠弗厭日惟操井臼勤刀尺不言其勞
邵法程妻牛氏 秦發興妻趙氏舅姑早卒夫沒無子
女家奇窮與孀祖姑同處祖姑沒後無可倚藉針紉以自
度 邵德輝妻常氏 秦上林妻陳氏 郭繼先妻李氏
賈如蕙妻馮氏 監生王璋妻李氏 張守忠妻李氏
霍振江妻張氏 杜顯文妻趙氏 貢生杜又甫妻劉
氏 畢奎芬妻霍氏 畢冬梅妻賀氏 王履中妻郭氏
司樹梧繼室王氏將婚夫疾革父母欲止女曰女子須
守從一之義敢有二心哉父母聽之入門三日而夫亡
趙謙妻李氏 李永恭妻焦氏夫沒遺孤三歲家計窘族

叔憐之欲其改適先以言試之曰窮乏至此盍鬻祭器以爲養氏正色曰爾族人能分潤則潤之勸人鬻物是何心哉族叔慙 焦東桂妻牛氏夫沒遺孤二貧難度日姑令改嫁氏曰吾願守此呱呱者衣食不以勞母也 龐應璧

妻璩氏 龐泰順妻李氏 祁埊妾陳氏 郭宗璇妻陳

氏 祁璜妻趙氏 郭成業妻侯氏 祁之鈗妻秦氏

涉東成妻楊氏 張思敬妻王氏 郭鳴埭妻牛氏 李

春榮妻陳氏 焦鵬翔妻祁氏夫沒無子外弟欲奪其志

使人探之氏聞而怒與外弟絕 常育桐妻賈氏夫沒繼

姪爲嗣旋死撫稚孫孫又天氏悲痛爲失明復擇族子立

高平縣志

卷六 人物下

三

之未幾又死 陳百羣妻祁氏 楊俊妻張氏 楊九齡

妻馮氏 李原新繼室李氏 李廣聚妻張氏 劉海玉

妻丁氏 邵太平繼室張氏夫沒遺子四月有勸其改適

者氏泣曰吾青年妨夫罪孽已大當自安義命耳 李召

南繼室岳氏 李燕祥妻魏氏 邢士秀妻袁氏 監生

姬德純繼室張氏 監生李鎬妻郭氏 張玉蛟妻薛氏

楊仙源妻侯氏 杜先羸妻李氏 焦成株妻高氏

賈文懋繼室張氏 史書雲妻李氏 張法妻王氏 王

經妻侯氏 史建貴妻張氏 張承澤妻白氏夫沒後子

始生家奇貧勤鍼帶以資衣食有嬾生子而亡夫兄以無

乳將子鬻諸人氏強留而撫之 庠生丁昂麒妻李氏

焦添楨妻李氏 楊敷榮妻杜氏 楊占魁妻劉氏 王

長甯繼室龐氏 貢生李建南妻陳氏 袁成德妻白氏

賈鉞妻吳氏 楊魁吉妻蕭氏 楊喜鎖妻朱氏 李

燉妻喬氏 田廣茂妻李氏 李璉妻楊氏 庠生邵如

淮妻楊氏 張作舟妻邢氏夫沒撫前妻子如所生姑病

癱疾氏維持調護終年不怠 張體乾妻司氏 張國華

繼室邵氏 郭天驥妻楊氏 石含泉繼室李氏 邵秉

仁妻袁氏 劉禎祥妻常氏 監生孟繼賢繼室李氏

張致祥繼室王氏 申學孔妻王氏 郭萬枝妻李氏

高平縣志 卷六 人物下 三

田基繼室崔氏 牛兆祥妻蘇氏 李昌安妻田氏夫沒

撫孤以事舅姑夫庶出嫡姑與庶姑時生谿勃氏調停之

甚得兩姑歡 王一元妻杜氏夫亡子幼姑患噎食氏晨

昏祈禱延醫萬方奉湯藥惟謹 邵懋德妻王氏 趙平

章妻申氏 監生高秉文繼室許氏 許永治繼室李氏

王咸熙妻李氏 郭大成繼室唐氏 王致中妻孟氏

劉積慶妻王氏 武平知縣唐瀛士繼室孟氏夫沒氏

無子撫前妻子恩若所生念夫爲清白吏安貧守節躬操

作一如寒素 許樹堂繼室張氏 郭樹綱妻李氏翁姑

早逝夫依叔以居夫沒氏事叔逾謹 石庚寅妻侯氏未

婚而夫沒女聞痛哭誓於父母願歸石氏從之 袁潤妻
李氏 緱道洽妻郭氏于歸半載而夫沒無子未幾娣亡
遺子枋尚在襁褓氏鞠育之卽以爲嗣未幾兄嫂亦沒遺
子二歲亦爲撫之 趙雲慶妻王氏 武堽妻張氏 連
東亮妻張氏 吳永河妻王氏 韋兆慶妻秦氏 李祚
錫妻司氏 王諱妻李氏 郭席瓚妻馮氏 牛克庸妻
王氏

以烈聞者更有楊振勳妻趙氏夫故不食八日死 吳玉
珠妻黃氏夫沒氏生一女甫四歲其娣妯知氏性烈環守
十晝夜氏給之曰吾何忍舍此呱呱者而遽死也衆信之

高平縣志

卷六 人物下

三

少懈遂於是夜自經死 司紹海繼室劉氏夫沒時氏憐
遺孤尚在襁褓含痛鞠之不五年子殤氏以撫孤未成無
以慰夫地下悲憤自裁 楊武元妻韓氏夫沒無子氏念
夫無骨肉無以安窀穸遂忍淚躬自營葬事畢投繯死

暴毀甲妻林氏夫沒於賈一女尚幼氏聞痛不欲生舅姑
勸其撫育幼女已而幼女殤氏卽縊死 郭廣興妻吉氏
夫沒亟營殯葬已遂引決而卒 崔守誠妾幼鬻於李
方楠家旋歸守誠不知其姓氏嫡氏劉羣以劉氏之大婦
不能容氏默受之無怨色數年守誠之母病守誠亦病病
且死氏以死自誓母曰爾死我病將益劇氏感悟日夜侍

湯藥不少離俄而母卒氏哭之痛曰吾主死吾主之母又死吾今得死期矣初守誠之卒也氏過里門池輒自語曰此吾死所也母卒竟以浣衣投池死焉

其遲而不及請旌與例不符旌者則牛丙斗妻魏氏 王

璋妻秦氏 邵振聲妻郭氏 趙發陞妻郭氏夫病亟迎

女入門未成禮而卒氏屢欲自盡卒不得聞及姁至氏曰

有代吾養姑者矣俄以疾卒 郭宗珍妻李氏夫沒無子

氏求死姑曰爾死如我何我死爾死可也氏泣而從之逾

月姑卒氏減餐十餘日亦卒 李因天妻郭氏未婚而因

天死女聞堅卧不起殯有日矣女請於父母曰兒欲往從

高平縣志

卷六 人物下

三

夫家願父母弗違兒志也父母曰兒能是吾何恨第爲日

大難吾不忍沒兒以青年也女仍堅卧不起父以告其舅

舅亦慰止之女曰舅兒女我非丈夫我我願歸李氏死不

憾矣遂不食舅喜聞於官官以綵仗鼓吹導之余至則適

李氏已三年爲旌其門曰女貞獨秀 朱新丑妻王氏新

丑故石工傭食岳陽氏獨居其母後夫朱圭則屢挑之輒

詈一日母僞爲紉衣呼氏過其室閉氏及圭則而外鍵其

戶圭則愈欲犯之氏大罵鄰人救之得免夫歸以告乃誘

圭則至而以沸湯灌之其母來訴余鞠得實答圭則而表

其間曰化遵行露 余嘗考秦會稽刻石曰夫爲寄猥殺

之無赦妻爲逃嫁子不得母以始皇之蕩滅禮教而防風
正俗之禁未肯少貶知人綱人紀之垂於世者重也高平
婦女不事紡績佚則生淫接脚孤老逃亡之風屢創之而
未艾然十畝不輟於芳草風雨不已於雞鳴百數十年間
貞女烈婦守潔白之操厲堅苦之節者蓋亦未嘗絕焉余
觀所傳諸婦女類出於窮檐下戶食貧作苦之家以視世
之峩冠博帶仕華廡而享厚祿平居侈談節義及驟膺禍
難逃亡無所甚則稽首賊庭以求苟活若廬州知府胡元
煒六安知州鈕福疇臣事粵逆恬不羞赧亦何婦人女子
之不若哉